

Paonori Nomaquë ya'huëpisopita ninshitërinso'

Paonori imapisopita yonquiaton, ninshitërinso'

1 ¹Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahuë. Quisocristoí-chin natërahuë. Ina acorinco paato nanamën a'china'huaso marë'. Yosë nohuanton, noya nanan a'chinárahüë.

²Co'huara Quisocristo o'mayatë-rasohüë', ina nanan chachin Yosë sha'huitërinpoa'. Quiricanën quëran anitotërinpoa', iráca ninshitopiso'. Ina nohuanton, na'a pënëntona'piro'sa' ninopi. ³“Hui'nahuë a'paimarahuë,” tënin Yosë. Napoaton Quisocristo isoro'-paquë o'marahuaton, piyapi chachin nasitimarin. Tapi shiin inaso'. ⁴Yosë pochachin ni'ton, noyasáchin ninin. Chimpinpirinhuë', Yosëri ananpitaantarin. “Inaso' tëhuëenchachin Yosë hui'nin. Chini chiníquën nanantarin,” tënëhua'. Ananpitaantarin ni'ton, nitotërëhua'. Quisocristo chachin hua'anëntërinpoa' ni'ton, “Sinioro” itërëhua'.

⁵Ina nosoroatonco, acorinco nisha nisha piyapi'sa' a'chinta'huaso marë'. Inapitanta' nanamën natëcaiso marë' pënënarahuë. Natëhuachina', “Quisocristoso' noya noya,” tosapi. ⁶Canpitanta' nisha piyapinquëma' nipomarahuë', Quisocristo imarama'. Yosë nohuanton, imarama'. ⁷Napoaton Nomaquë ya'huëramasopita ninshitaranquëma'. Yosë pa'pi nosororinquëma'. Nani acorinquëma'

piyapinënpita nicacamaso'. Ni'ton, inasá-chin yonquicaso' ya'huërin. Tata Yosë inaora nohuanton, catahuainquëma'. Asanocancainquëma'. Quisocristonta' inapochachin catahuainquëma'. Inaso' hua'anëntërinpoa'.

Inapita marë' Yosë nontërinso'

⁸Canpitaso' noya Yosë natërama', natantërahuë. Ya'ipi piyapi napopi. Ina natantato, “Yosparinquën Sinioro,” itërahuë Yosë. Ina'ton napotërahuë. Quisocristo catahuarinco ina pochin Yosë nonta'huaso marë'. ⁹Yosë ni'sárinco, no'tëquën nontaranquëma'. Ya'ipi cancanëhuë quëran huarë' Yosë imarahuë. Hui'nin nanamën a'chinárahüë. Nani tahuëriya canpita yonquiátëinquëma', ¹⁰Yosë nontarahuë. “Noya catahuaquë',” itërahuë. Iráca quëran huarë' nicapëncuëma' yapa'pirahuë', co nanitërahuë'. Ipora huanta' paca'huaso' yonquiarahuë. “Quëma nohuantohuatan, Sinioro, catahuaco onpoponta' pa'i,” tënhuë, Yosë nontato. ¹¹Yani'nancuëma'. Yacatahuanquëma' chiníquën cancantamaso marë'. Ina quëran noya noya imasarama'. ¹²Canpitanta' noya imapatama', achinicancanaramaco canta'. Noya ninontatëhua', noya noya cantarihuá'.

¹³Tëhuëenchachin iyaro'sa', iráca quëran huarë' nicapëncuëma' yapa'pirahuë'. Ipora huanta' co nanitërahuë' paca'huaso'. Nisha nisha parti

a'chinpatëra, piyapi'sa' natëtona', Quisocristo imasapi. Canpitanta' yaa'chintëranquëma' noya noya imacamaso marë'. ¹⁴Ya'ipi piyapi'sa' pënëna'huaso' ya'huërin. Quisocristo sha'huitërinco. "Hua'ano'sa', topinan piyapi'sa', ya'ipi nananquë nonpisopita a'chintëquë'. Quirica nitotoro'sa', co nitotoro'sahuë', ya'ipiya pënënuquë'," itërinco. ¹⁵Napoaton canpitanta' yaa'chintëranquëma'. Nomaquë ya'huëramasopitanta' Quisocristo nanamën a'chinchinquëma' tënahüë.

Quisocristo nanamën

¹⁶Co caso' tapanahuë' Quisocristo nanamën a'china'huaso marë'. Piyapi'sa' natëhuachina', Yosëri anoyacancantarin. Inaíchin nanitaparín nicha'ëinpoaso'. Cotioro'sari'ton natëhuachina', anoyacancantarin. Iporaso' nisha nisha piyapi'santa' anoyacancantarin. Napoaton pa'yatërahüë nanamën sha'huica'huaso'. ¹⁷"Yosëíchin anoyacancantërinpoa'," topatëhua', Yosë noya ni'sarinpoa'. Oshanënpoa' inquitatonpoa', co huachi inapita yonquiarinhuë'. Quiricanën quëran ina anitotërinpoa'. "Cancanënpoa quëran huarë' Yosë natëhuatëhua', noya ni'sarinpoa' ni'ton, noya nanpimiatarihua'," tënin Yosë quiricanënuquë. Co canpoara nanitërehuahuë' noya cancantacaso'.

Iráca quëran huarë' oshahuanpiso'

¹⁸Yosë inápaquë ya'huaponahuë', cancanënpoa quëran anitotërinpoa'. "Piyapi'sa' co noyahuë' nipi. Co ca pochín cancantopihuë'. Ina marë' no'huito, ana'intarahüë huachi," tënin Yosë. No'tën nanan nitotaponaraihuë', co nohuantopihuë' natëcaiso'. ¹⁹Cancanëna quëran Yosë nohuitochinachin

acopirinhüë', co yanohuitopihuë'. ²⁰Isoro'pa' ninin quëran huarë' piyapi'sa' nitotopi. Yosëso' co quënanpirëhuahuë', nani ma'sha ninin. Ina nicatona', "Tëhuëenchachin Yosë ya'huërin. Ya'ipiya nanitaparín ni'ton, ina chinotahua'," ta'caso nipirinhüë', co nohuantopihuë'. Napoaton na'inpí. ²¹Yosë ya'huërinso' nitotaponaraihuë', co ina chinotopihuë'. Ina nohuanton, nani ma'sha ya'huëtopirinhüë', co ina marë' "Yosparinquën Siniro'," co itopihuë'. Nisha nisha yonquiatona', chihuërinso pochín nipi. Tashi pochín cancantopi. ²²"Ya'ipiya nitotërai," topirinhüë', co noya yonquipihuë'. ²³Yosëso' noyasáchin ninin. Co onporonta' chiminaponhuë'. Inaso nipirinhüë', co ina yonquipihuë'. Ina naniantatona', mamanshi nipi moshacaiso marë'. Mamanshi piyapi nonanpiso' moshapi. Co piyapi ya'huëmiatopirinhüë', ina yamoshapi. Nisha nisha ma'sharo'santa' moshapi. A'naquën anpantëhuano'sa', a'naquën no'paquë niohuaratërinso'pita, inapita moshapi.

²⁴Napoaton Yosëri tananpitërin co noyahuë' yonquipisopita nicacaiso marë'. A'porín. A'pohuachina, pa'pi co noyahuë' nipi. Taparosáchin yonquiatona', nisë'huapi. Co ina pochín nisë'huacaso'huë' nipirinhüë'. ²⁵Yosëri no'tëquën anitotopirinhüë', ina a'porahuatona', nonpín nanan natëpi. Ma'sha isoro'paquë ya'huërinso'pita moshatona', chinotopi. Yosëriáchin ya'ipiya ninin nipirinhüë', co inaso' chinotopihuë'. Tëhuëenchachin inasáchin chinotacaso' ya'huërin, tënahüë. Amen.

²⁶Napoaton Yosëri tananpitërin pa'pi co noyahuë' cancantacaiso marë'. Sanapi'sa' co huachi so'ina' nohuantopihuë'. Sanapi capín nisë'huacaiso' nohuantopi. Co ina pochín nicacaso'huë'

nipirinhuë'. ²⁷Quëmapi'santa' co huachi sa'ina' nohuantopihuë'. Quëmapi capini nisë'huapi. Ina marë' na'lnpi ni'ton, Yosëri ana'ntarin. Co no'tëquën yonquiatonaraihuë', nitapicancanpi. Nonënanta' tapipi.

²⁸Co Yosë yanatëpihuë' ni'ton, inari a'porin co noyahuë' nicacaiso marë'. Nitapicancamiatopi. ²⁹Pa'pi co noyahuë' nipi. Nimonshitacaisoráchin yonquipi. Na'con oshahuanpi. A'na piyapi ma'shanënpita nohuantapapi. Piyapi chinotopi. Niapiratopi. A'naquën tëpatopi. Nino'huipi. Nonpinápi. No'huitápi. A'napita nonpinapipi. ³⁰Nipinopi. Yosë inimicotopi. Ma'tona ma'tona nonpi. "Caso' noya noyaco," ta'tona', a'napita nocanpi. Yonquirápi co noyahuë' nicacaiso marë'. Pa'pina', a'shina', co inapita tëranta' natëpihuë'. ³¹Co huachi noya yonquipihuë'. Nonpinápi. Co quëmopinënpita tëranta' nosoropihuë'. No'huitochinachin cancantopi. ³²"Co noyahuë' nipsisopita chiminpachinara, ana'ntacaso' ya'huërin," tënin Yosë. Ina nitotaponaraihuë', inachachin niantapi. Naporahuatona', a'napitanta' co noyahuë' nipachinara, pa'yatopi.

Yosëri no'tëquën ana'intërinso'

2 ¹A'naquëma' iyaro'sa' piyapi'sa' yonquirapiratoma': "Paso' quëmapi co noyahuë' ninin," tënama'. Napoapomarahuë', ina pochachin canpitanta' co noyahuë' ninama'. Napoatoma', nina'intarama'. ²"Co noyahuë' nipatama', ana'intaranquëma'," tënin Yosë. No'tëquën inaso' ana'ntarin, nitotërhua'. ³"Pasopita oshahuanpi," tënama'. Nipirinhuë', canpitanta' co noyahuë' nipatama', Yosë ana'intarinquëma co cha'ësaramahuë'. ⁴Yosë nosororinpoaso' co no'tëquën yonquiramahuë'. "Co a'naroáchin no'huirinpoahuë'," ta'toma',

co noyahuë' ninama'. Tëhuëinchachin co a'naroáchin ana'intërinquëmahuë'. "Oshaquëran co noyahuë' yonquipisopita naniantapona' nimara," ta'ton, ninarárin. ⁵Canpitaso nipirinhuë', co natantochináchinhuë' cancantërama'. Co oshanëma' yaa'poramahuë'. Napoaton ayaro' tahuëri chini chiniquën ana'ntarinquëma'. Naporo' ya'ipi piyapi'sa' no'tëquën ana'ntarin. ⁶Ya'ipi ninëhuasopita Yosë nitotërin. Ayaro' tahuëri ina yonquiaton, no'tëquën sha'huitarinpoa'. Noya nipatëhua', noya acoarinpoa'. Co'so' noya nipatëhuahuë', ana'ntarinpoa'. ⁷Noyasáchin nipatëhua', noya ni'sarinpoa'. Yosë yonquiatëhua', noya acoinpoaso marë' na'con nohuantohuatëhua', ananpitaantaripoa'. Inarë'quënpoa' ya'huëmiatarihua'. ⁸Nipirinhuë', canpoara nohuantërehuasoráchin nipatëhua', no'huiarinpoa'. No'tëquën anitotopirinpoahuë' co natëhuatëhuahuë', ana'ntarinpoa'. Co noyahuë' nipatëhua', chiniquën ana'ntarinpoa'. ⁹Ya'ipi co noyahuë' nipsisopita no'tëquën ana'ntarin. Naporo' chiniquën parisitapi. Cotioro'sa' no'tëquën chachin ana'ntarin. Nisha piyapi'santa' co noyahuë' nipachina, inapochachin ana'ntarin. ¹⁰Noya nipsisopitaso nipirinhuë', noya ni'sarin. Noya noya acorarin. Asanocancanarin. Cotioro'sa' no'tëquën chachin napotarin. Nisha piyapi'santa' inapochachin nitarin. Ya'ipinpoa' noya nipatëhua', nicha'ësaripoa'.

¹¹Yosëso' ya'ipinpoa' napopianachin ni'ninpoa'. ¹²Íraca Moisésëri cotioro'sa' pënënin nani ma'sha natëcaiso'. Cotioro'saráchin pënënin. Co ina natëhuachinahuë', oshahuanpi. Ina marë' Yosëri ana'ntarin. A'napitaso nipirinhuë' co pënëntërinso' nitotopihuë'. Co nitotatonahuë', co ina natëcaiso'

ya'huëpirinhuë'. Co noyahuë' nipa-china', ana'intarin chachin inahuanta'.¹³ Cotioro'saso' Moisésë pënëntërinso' natanaponaraihuë', co natëtopihuë'. Napoaton co Yosëri noya ni'ninhuë'. No'tëquën natëpi naporini, Yosëri noya ni'itonhuë'.¹⁴ Nisha piyapi'saso' co Moisésë pënëntërinso' nitotopihuë'. Co nitotaponaraihuë', a'naquën noya nipi. Inahuara cancanëna quëran nitotopi ni'ton, napopi.¹⁵ Cancanëna quëran Yosëri anitotërin noya nicacaiso'. Co noyahuë' nipachinara, inahuara nitotopi. "Co inapocaso nipirinhuë', inaporëhua'," topi yonquiatona'. Inapochachin noya nipachinara, inanta' cancanëna quëran nitotopi.¹⁶ Ayaro' tahuëri ya'ipi co noyahuë' yonquirëhuasopita aipitarinpoa'. Po'oana quëran ma'sona tëranta' onporëhuasopita a'ninquëchin anitotaripoa'. Naporo' tahuëri Tata Yosë nohuanton, Quisocriso no'tëquën sha'huitarinpoa'. Co noyahuë' nipatëhua', ana'intarinpoa'. Ina nanan ya'ipi parti sha'huirarahüë.

Co cotioro'sa' tëranta Yosë pënëntërinso' natëpisohüë'

¹⁷ A'naquëma' cotioro'sanquëma' ni'ton, a'napita nocanama': "Moisésë pënëntërinso' natëhuatoï, cha'ësarai," tënama'. "Yosë na'con na'con nosororincoï," tomantatoma', a'napita nocanama'.¹⁸ Yosë nohuantërinso' nani nitotërama'. Yosë quiricanën a'chintërinënuëma' ni'ton, nitotërama' noya nicacamaso'.¹⁹ Nisha piyapi'santa' yaa'chintërama'. Inapitaso' co Yosë nohuitatonaraihuë', somaraya pochin niconpi. Tashi pochin cancantopi.²⁰ Co Yosë nanamën nitotopihuë' ni'ton, yaa'chintërama'. "Yosë no'tëquën pënënincoï ni'ton, noya noya nitotërai. A'napitaso' co quiya pochin nitochátërapihuë'," tënama'.²¹ A'napita a'chintopiramahuë', çonpoatomata'

canpita chachinso' co yonquiramahuë? "Ama ihuatocosohüë'," tapomarahüë', çonpoatomata' ihuatërama'?²² "Ama a'na quëmapi sa'in monshitocosohüë'," tapomarahüë', çonpoatomata' canpitanta' monshihuanama'? Piyapi'sa' mamanshi moshahuachinara, no'huirarama'. "Yosëichin chinotacaso nipirinhuë'," tënama'. Napoapomarahüë', çonpoatomata' co cancanëna quëran huarë' chinotëramahuë'? Co mamanshi moshapiramahuë', moshatopiso pëiquë ihuatërama'.²³ "Quiyasáchin Moisésë pënëntërinso' nitotërai," tënama'. Napoapomarahüë', co natëramahuë'. Ina marë' a'napitari Yosë pinopi.²⁴ Co noyahuë' cancantërama' ni'ton, nisha piyapi'santa' co Yosë noya ni'sapihuë'. Quiricanënuë chachin naporin:

²⁵ "Quiyaso' Yosë piyapinënpitacoï," ta'toma', marca niacotërama'. Moisésë pënëntërinso' noya natëhuatama', no'tëquën niacotërama'. Nipirinhuë', co natëhuatamahuë', topinan quëran marca niacotërama'.²⁶ Nisha piyapi'santa' niponaraihuë', Yosë natëhuachina', piyapinënpita pochin ni'sarin.²⁷ Co marca niacotaponaraihuë', Yosë natëhuachina', sha'huirapiaponënuëma'. Canpitaso' pënëntërinso' nitotapomarahüë', co natëhuatamahuë', Yosë ana'intarinquëma'.²⁸ Cotioro'sanquëma' nipiramahuë', co ina marë' piyapinënpita pochin ni'ninquëmahuë'. Inapochachin Yosë marcanënta' co topinan nonënpoaquë niacotacaso' ya'huërinhuë'.²⁹ Ya'ipi cancanënpoa quëran Yosë imapatëhua', tëhuënchachin piyapinënpita pochin ni'sarinpoa'. Marcanën cancanënpoaquë acotërinpoa'. Co nonënpoaquë acotërinpoahuë'. Ispirito Santo anoyacancantërinpoa'. Ina quëran noya ni'ninpoa'. Co piyapi'sa' pa'yatopirinënpoa'huë', Yosëso' noya ni'sarinpoa'.

3 ¹Cotioro'sa' ni'tona', marca niacotopi. ¿Ma'ta' ina marè' canapi? ²Na'con canapi ténahuè. Yosèri na'con catahuarin. Inahua'ton iráca nontèrin. Nanamèn chachin aninshitérin ya'huémiatacaso marè'. ³A'naquénso' co huachi ina natè-pihuè!. Ina niponahuè!, co nanitérèhuè!: “Yosèso' co no'tèquèn sha'huitèrinhuè!” ta'caso!. ⁴Yosèriso' co onporonta nonpintarinhue!. Ya'ipi piyapi'sa' nonpinpirinahuè!, Yosèso' no'tèquénáchin nonin. Quiricanèn quèran naporin:

“No'tèquénáchin nontèrancoi ni'ton, a'naquèn nonpinapi-pirinènuquènhuè!, co onporonta' minsëarinèn-quènhuè!” ténin.

⁵A'naquèn po'pin yonquipi: “Canpoa co noyahuè ninèhua ni'ton, Yosè noyasáchin nininso' a'ninquèchin anitotèrinpoa!. Napoaton ana'intoahuachinpoa!, co no'tèquèn ana'intèrinpoahuè!” toconpi. ⁶¿Co ina pochin yonquicaso ya'huèrinhuè! Yosèso' noya ni'ton, no'tèquèn ana'intiinpoaso' ya'huèrin. Co ana'intiinpoaso' ya'huèrinhuè! naporini, co ayaro' tahuèri no'tèquèn sha'huichitonpoahuè!.

⁷A'naquèonta' taponá: “Caso' nonpinpirahuè!, Yosèso' no'tèquénáchin nonin. Nonpinahuè ni'ton, Yosè no'tèquénáchin noninso' a'ninquèchin anitotèrinpoa!. Napoaton co oshahuan pochin Yosè ana'intincoso' ya'huèrinhuè!” toconpi. Co no'tèquèn yonquipihuè!. ⁸A'naquènta napopi: “Huèco' manta tèranta' niahua' Yosè na'con na'con catahuainpoaso marè!. Paono chachionta' ina pochin a'chintèrinpoa!” topi pinotonaco. Co no'tèquèn yonquipihuè! ni'ton, napopisopita no'tèquèn ana'intacaso' ya'huèrin.

Ya'ipinpoa' oshahuanèhuaso'

⁹¿Onpopinta' iporasos' yonquiarihua'? Cotioro'sanpoa noya noya ninèhua!,

¿tècarihua ti? ¿Co naporinhuè! Nani sha'huitèranquéma!. Cotioro'sanpoa!, nisha piyapi'sa', ya'ipinpoa' oshahuanèhua!. ¹⁰Yosè quiricanènquè tapon:

“Ya'ipi piyapi'sa' co noyahuè' nipi.

Co a'naya tèranta' noya nininhuè!.

¹¹Co no'tèquèn yonquipihuè!.

Co inahua nohuantopihuè Yosè chinotacaiso!.

¹²Co Yosè iranèn pa'topihuè!, pèshonpi.

Co a'naya tèranta' noya nininhuè!.

¹³Chimipi pa'pitopiso'

i'soatopinan pochin

napoonin nonpi.

Nonpintatona!, ya'huan tomain yanquètèrinso pochin na' piyapi'sa' aparisitopi.

¹⁴No'huitatona!, piyapi'sa' pino-sápi.

¹⁵A'naroáchin yaahuètopi, yatèpa-topi.

¹⁶Insèquèsona pa'pachinara, piyapi'sa' aparisitopi, asètopi.

¹⁷Piyapi'sa' ano'huitopi ni'ton, co noya nini'tona' ya'huèpihuè!. Co sano cancantopihuè!.

¹⁸Yosè tè'huatacaso' ya'huèpirinhuè!, co ina yonquipihuè!” ténin iráca Yosè quiricanènquè ninshitatona!.

¹⁹Tèhuèenchachin co noyahuè! nica-tèhua!, ya'ipinpoa' oshahuanèhua!. Yosè pènèntèrinso' nitotopirèhuahuè!, co natèrèhuahuè! ni'ton, ana'intinpoaso' ya'huèrin. ²⁰“Pènèntèrinso' natèhuatèhua!, Yosè noya ni'sarinpoa!” topirinahuè! a'naquèn. Co ina marè' noya ni'ninpoahuè!. Pènèntèrin quèran oshahuanèhuaso' anitotèrinpoa!. Ina

natanpatëhuara, “Tëhuënychachin oshahuanëhua'. Co noyahuë' ninëhua',” tënëhua'.

**Quisocristo imapatëhua',
anoyacancantërinpoaso'**

²¹Iporaso nipirinhüë' Yosë anitotërinpoa' onporahuatësona cha'ëcaso'. Co iráca pënëntërinso' natërehua quëran noya cancantarihuahuë'. Moisésë, pënëntona'piro'sa', inapita inachachin sha'huitërinënpoa'. ²²Quisocristo imapatëhua', Yosë noya ni'sarinpoa'. Insosona natëhuachin, anoyacancantarín. Co nisha nisha nontërinpoahuë'. ²³Ya'ipinpoa' oshahuanëhua'. Co a'nayanpoa tëranta' Yosë pochín cancantërehuahuë'. ²⁴Nipirinhüë', inaora nohuanton, Yosë nosororinpoa'. Nosoroatonpoa', Quisocristo a'paimarin nicha'ëinpoaso marë'. Ina imapatëhua', Yosë noya ni'sarinpoa'. ²⁵Yosë nohuanton, Quisocristo chiminin. Oshanënpoa' inquitinpoaso marë' chiminin. “Ca marë' chiminin,” topatëhua', oshanënpoa' inquitarinpoa'. Huënainën quëran anoyacancantarínpoa'. Iráca piyapi'sa' oshahuanpirinahuë', Yosëri co a'naroáchin ana'intërinhuë'. “A'na tahuëri Quisocristo chiminpachin, oshanëna' inquitarahüë,” ta'ton, co ana'intërinhuë'. ²⁶Iporaso huachi Quisocristo chachin a'paimarin ya'huërenamënpoa' chiminacaso marë'. “Quisocristo oshanënpoa marë' chiminin,” topatëhua', oshanënpoa' inquitarinpoa'. Noyápiachin cancan quëtarínpoa'. Ina imapatëhua', Yosë noya ni'sarinpoa'. Co canpoanta' ana'intarinpoahuë'.

²⁷Napoaton co inso tëranta nocanacaso' ya'huërinhuë', tënahüë. Co pënëntërinso' natërehuaso marë' Yosë noya ni'ninpoahuë'. Quisocristo naporinso' natërehuaso marë' nicha'ërinpoa' ni'ton,

co a'napita nocanacaso' ya'huërinhuë'. ²⁸Nani sha'huitëranquëma'. Quisocristo imarëhuaso marë' anoyacancantërinpoa'. Co ya'ipi pënëntërinso' natëpirëhuahuë', noya ni'ninpoa'.

²⁹Yosë ya'ipi piyapínpoa' nohuantërinpoa'. Co cotioro'saráchin nosororinhüë'. Nisha piyapi'santa' nosororín. Ya'ipinpoa' nosororínpoa'. ³⁰A'naíchin Yosë ya'huërin. Ya'ipinpoa' napopianachin nosororínpoa'. Cotioro'santa', nisha piyapi'santa', Quisocristo imapachina', anoyacancantarín. ³¹Quisocristoíchin anoyacantërinpoa' ni'ton, iráca pënëntërinso' ¿co huachi pa'tërinhuë pochín nitërehua ti? ¿Co naporinhüë! Ina quëran oshahuanëhuaso' nitotaríhua'. Quisocristo imapatëhua', catahuarínpoa' noya natëcaso'.

Apraan natëterínso'

4 ¹Apraan naporínso' sha'huichinquëma'. Inaso' shimashonënpoa'. ¿Onporahuatonta' Yosëri noya ni'nin? ²Apraan inaora co nanitërinhuë' no'tëquën Yosë natëcaso'. Inaora nanitërin naporín, “Caso' noyaco. No'tëquën natërahuë,” chitonhuë'. Napoapona-hüë', co ina pochín Yosëri ni'ninhüë'. ³Yosë quiricanënquë naporín: “ ‘Yosë no'tëquën nontërinco. Inasáchin catahuarínco,’ topachina, Yosëri noya ni'nin. Oshanën inquitaton, noya ni'nin,” ténin quiricanënquë. ⁴Ni'co'. Piyapi'sa' sacatohuachinara, pahuërecaso' ya'huërin. Inapochachín no'tëquën natërehua' naporín, Yosë noya nicainpoaso' ya'huë'itonhuë'. ⁵Yosëso nipirinhüë', inaora nohuanton nosororínpoa'. “Co caora noya nipirahuë', Yosë chachin anoyacancantarínco,” topatëhua', oshanënpoa' inquitatonpoa' noya ni'ninpoa'. ⁶Co noyahuë' nipirëhuahuë', inaora nohuanton, Yosë anoyacancantërinpoa'

ni'ton, noya ni'ninpoa'. Ina marë' nóa
cancantërehua'. Iráca Tapi inachachin
naporin. ⁷Quiricanënguë ninshitërin:

“Oshanënpoa' Yosë inquitohua-
chinpoa', noya cancanta-
rihua'. Ya'ipi oshanënpoa'
ayatarinpoa'.

⁸ ¿Co huachi oshanënpoa marë'
ana'intarinpoahuë'!

Napoaton noya cancantarihua',”
tënin.

⁹ ¿Inpitata' ina pochin noya cancanta-
tapi? Co cotioro'saráchin ina pochin
noya cancantacaso' ya'huëtópihuë'.
Co marca niacotopirinahuënta' noya
cancantapi. Apraan yonquico'. “Yosë
no'tëquën nontërinco. Inasáchin cata-
huarinco,” topachina, Yosëri noya ni'nin.
Nani sha'huitëranquëma'. ¹⁰ ¿Onpo-
rota' noya ni'nin? ¿Marca niacotërin
piquëran noya ni'nin? Co naporó'
naporinhuë'. Co'huara marca niacocha-
tërasohuë', noya ni'nin. ¹¹ Yosë natërin
ni'ton, inari noya ni'nin. Co'huara
marca niacochatërasohuë', piyapinë
pochachin ni'nin. Ina piquëran marca
niacotërin imarinsó' anitotacaso marë'.
“No'tëquën nontërinco,” topachina,
noya ni'nin. Nisha piyapi'santa' ina
pochachin natëtohuachinara, Apraan
pochin cancantopi. Co marca niacoto-
pirinahuë', Apraan hui'ninpita pochin
nipi. ¹² Cotioro'santa' Apraan pochin
natëtohuachinara, hui'ninpita pochin
nipi anta'. Co marca niacotopiso marë'
noya cancantopihuë'. Co'huara marca
niacochatërasohuë', Apraansó' natëtërin.
A'napitanta' ina pochin cancantohua-
chinara, Yosëri noya ni'sarin.

Yosëri Apraan sha'huitërinso'

¹³ Iráca Yosëri Apraan itapon: “Nosó-
roatënguën, páncaro'pa' quëchinquën.
Piyapinëhuë pochin ni'saranquën.

Quëma shinparinpitanta' noya cata-
huaarahuë. A'na tahuëri ya'ipiro'pa'
hua'anëntapona',” itërin. “Yosë co
onporonta' nonpintarincohuë',” téninso
marë' Yosëri noya ni'nin. Co naporó'
Moisësë pënëchátërarinhuë'. Napoaton
co ina natërinso marë' Apraan noya
ni'ninhuë'. ¹⁴ Pënëntërinso' natëpi-
sopitaráchin noya ni'nin naporini,
topinan cancantëpoa quëran natë-
rehuasopitasó' co noya nicainpoaso'
ya'huë'itonhuë'. Topinan quëran Yosëri
Apraan sha'huichitonhuë'. ¹⁵ Moisësë
pënëntërinso' co natëhuachinarahuë',
ana'intacaso' ya'huërin. Co pënëntë-
tërinso' ya'huërinhuë' naporini, co
natëcaso' ya'huë'itonhuë'. Co ina marë'
oshahuaintërihuahuë'.

¹⁶ Napoaton Apraaniso natëton: “Yosë
no'tëquën nontërinco,” topachina,
Yosëri itërin: “Oshahuanpiranhuë',
caora nohuanto, nosoroatënguën cata-
huanquën. Hui'nanpitanta' catahua-
rahuë,” itërin Yosëri. Co cotioro'saráchin
nosororinhuë'. Ya'ipi Apraan pochin
cancantopisopitanta' nosororin. Ina
hui'ninpita pochin ninëhua'. ¹⁷ Iráca
Yosëri Apraan itërin: “Ca nohuanto,
notohuaro' shiparinpita ya'huëtarin-
quën. Na'a nisha nisha piyapi'santa'
quëma pochachin cancantapi,” ténin
Yosë. Quiricanënguë naporin. “Yosë
no'tëquën nontërinco. Ya'ipiya nani-
taparin. Chiminpisopitanta' nanitërin
ananpitacaso'. Co ma'sha ya'huëpirin-
huë', nani ya'huërinso pochin sha'-
huichanin,” ta'ton, Apraan natëtërin.

¹⁸ “Quëma shiparinpita notohuaro'
na'asapi,” itërin Yosëri. Hua'qui' co
a'na hui'nin tëranta' ya'huëtërinhuë'.
Sacai' natëtacaso nipirinhuë', Apraan
natëtërin. “Yosë nohuanton, oshaquëran
hui'nahuë ya'huëtarinco. Shihuëpi-
tanta' na'asapi,” ténin Apraan. ¹⁹ Pasa

pi'ipitaponahuë!, co hui'nin ya'huëchâtêrarinhuë!. Co huachi chinirinhuë!. Sa'ionta' co hua'huana'pihuë!. Nani paiya. Napoaponahuë!, Yosë natêrin.²⁰ “Yosë nonpintêrinco,” co téninhuë!. Co nisha nisha yonquirinhuë!. “No'têquën nontêrinco,” ta'ton, chiníquën cancantêrin. “Ma noyacha Yosëso' ni'ton, co naniantarincohuë!.²¹ Yosë ya'ipiya nanitaparin. Sacai' niponahuë!, nani sha'huitêrinco ni'ton, catahuarinco. Sha'huitêrinco chachin ya'huapon,” ténin.²² Ina pochin yonquirinso marë! Yosëri noya ni'nin.

²³Apraan naporinsopita Yosë quiri-canênquë ninshitopi. Canpoanta' nitotacaso marë! ninshitopi.²⁴ Ina pochin cancantohuatêhua!, Yosë noya ni'sarinpoa!. Quisocristo chiminpirinhuë!, Yosëri ananpitaantarin. Ina hua'anêntêrinpoa!, tênêhua!. Ina marë! Yosë noya ni'sarinpoa! canpoanta!.²⁵ Yosë nohuanon, oshanênpoa marë! chiminin. Inari chachin ananpitaantarin oshanênpoa' inquitatonpoa!, noya nicainpoaso marë!.

Yosë anoyacancantêrinpoaso!

5¹ “Sinioro Quisocristofchin nicha'ê-sarinpoa!,” ta'têhua!, imarêhua!. Oshanênpoa' inquitêrinpoa' ni'ton, Yosë noya ni'ninpoa!. Co inimiconênpita pochin ni'ninpoahuë!.² Quisocristo cancânênpoa quëran natêhuatêhua!, nicha'êsarinpoa!. Nosoroatonpoa!, ipora huanta' catahuarinpoa' noya imacaso marë!. A'na tahuëri Yosë'pa' pa'patêhua!, Yosë pochin nisarêhua!. Ina yonquiatêhua!, noya cancantarihua!.³ Iporaso' parisitarihuarahuë!, noya cancantarihua!. “Parisitohuatêhua!, Yosë catahuarinpoa' imamiatacaso marë!,” ta'têhua!, co sêtarihuahuë!. Chiníquën cancantatêhua!, noya ahuantarihua!.

⁴Noya ahuantohuatêhua!, chini chiní-quën cancantarihua' ni'ton, Yosë noya ni'ninpoa!. “Co naniantarinpoahuë!,” ta'têhua!, inasáchin ninarihua!.⁵ Inasáchin ninahuatêhua!, têhuënchachin co naniantarinpoahuë' ni'ton, co tapanarihuahuë!. Ispirito Santo a'patimarinpoa!. Ya'coancantohuachinpoa!: “Ma noyacha Yosë nosororinpoa paya,” tarihua!. Ispirito Santo chachin Yosë nosororinpoaso' anitotêrinpoa!.

⁶Canpoara co nanitêrêhuahuë! cha'êcaso!. Nipirinhuë!, iráca o'macaso' nanihuachina, Quisocristo isoro'paquë o'marin. O'marahuaton, oshahuano'sa marë! chiminin.⁷ Ni'co!. Piyapi noya niponahuë!, co insonta' ya'huêrênámên chiminacaso' nohuantêrinhuë!. Noya noya nipachin, nicha'êcaso marë! a'nara' ya'huêrêtapon nimara.⁸ Quisocristoso nipirinhuë! oshahuano'sa marë! chiminin. Oshahuanpirêhuahuë!, ya'huêrêtêrinpoa!. Yosë nohuanon, canpoa marë! chiminin. Napoaton: “Ma noyacha Yosë nosororinpoa paya,” tênêhua!.⁹ “Corosêquë huênainên pa'nin. Oshanênpoa marë! chiminin,” topatêhua!, Yosë noya ni'sarinpoa!. Napoaton ayaro' tahuërinta' catahuarinpoa!. Naporo' tahuëri co noyahuë' nipsisopita chiní-quën ana'intarin. Imarêhuasopitaso nipirinhuë!, co ana'intarinpoahuë!. Quisocristo chachin nicha'êsarinpoa!.¹⁰ Iráca oshahuanatêhua!, Yosë inimitopirêhuahuë!, hui'nin chiminin ni'ton, nanan anoyatêrinpoa!. Iporaso' noya nipayarêhuaso pochin ninêhua' ni'ton, noya noya catahuarinpoa!. Nanpiantarin ni'ton, catahuarinpoa' noya cha'êcahuaso marë!.¹¹ Naporahuaton, “Yosë nosororinpoa!,” ta'têhua!, ina pa'yatêrêhua!. Hui'nin chachin nanan anoyatêrinpoa' ni'ton, noya cancantêrêhua!.

Atan, Cristo inapita napopiso'

¹²Atan'ton co noyahué' nicaton, oshahuanin. Ina maré' chiminacaso' ya'huërin. Ina quëran ya'ipinpoa' co noyahué' nicatëhua', chiminëhua'.

¹³Co'huara Moisésë pënëchatërasohué', piyapi'sa' oshahuanpi. Oshahuanpirinahué', co pënëntërinso' ya'huëyátërarinhué' ni'ton, co ina maré' ana'intacaso' ya'hué'itonhué'. ¹⁴Nipirinhué', Atan quëran huaré' ya'ipi piyapi'sa' chiminpi. Moisésë ya'huëaquë huarënta' chimina'piapi. Ya'nán isoro'pa' nipon, Yosëri pënëpirinhué', Atan co natëtonhué', oshahuanin. Ina quëran ya'ipi piyapi'santa' co noyahué' nicatona', oshahuanpi. Co Yosëri chachin pënëpirinhué', inahuanta' oshahuanpi. Atan pochin cancantatona' ya'ipi piyapi'sa' oshahuanpi. Quisocrisoso nipirinhué' nanan anoyatinpoaso maré' o'marin.

¹⁵Inaso' ya'ipinpoa' nosororinpoa'. Atanso nipirinhué' co ina pochin nininhué'. Co natërinso marëhué' oshanën ya'huëtërin. Inapochachin ya'ipi piyapi'sa' oshahuanatona', chiminpi. Ina quëran ana'intacaso' ya'huërin. Yosëso nipirinhué' inaora nohuanton, na'con nosororinpoa'. Nosoroatonpoa', hui'nin a'paimarin na'aquënpoa' anoyacancantinpoaso maré'. ¹⁶Atan co natërinhué' ni'ton, osha ya'huërin. A'naíchin pënëninso' co natërinhué' ni'ton, ana'intacaso' ya'huërin. Nipirinhué', Yosë nosororinpoaso' co ina pochin nininhué'. Na'con oshahuanpirëhuahué', Quisocriso chiminin ni'ton, oshanënpoa' inquitatonpoa', noya ni'ninpoa'. ¹⁷A'na ya'piíchin tëhuërin ni'ton, ya'ipi piyapinpoa' chiminacaso' ya'huërin. Aquëtë huaré' Yosëso', inaora nohuanton nosoroatonpoa' Quisocriso quëran

nicha'ërinpoa' ni'ton, inaré'quënpoa' nanpimiatatëhua' hua'anëntarihua'.

¹⁸Atan co noyahué' ninin ni'ton, ya'ipinpoa' ana'intinpoaso' ya'huëpirinhué'. Quisocriso chiminin ni'ton, ya'ipinpoa' nanitërehua' nanpimiatacaso'. Imapatëhua', co ana'intarinpoahué'. ¹⁹A'naíchin co Yosë natërinhué' ni'ton, ya'ipinpoa' oshahuanëhua'. A'naso nipirinhué' Yosë natëton, chiminin. Ina maré' na'aquënpoa' anoyacancantërinpoa'.

²⁰Iráca Moisésë pënëntërin oshahuanëhuaso' anitotinpoaso maré'. Ina quëran na'con oshahuanëhuaso' nitotërehua'. Na'con oshahuanpirëhuahué', inaora nohuanton, Yosë na'con na'con nosororinpoa'. ²¹Oshahuanëhua' ni'ton, chiminpatëhua', parisitomiatacaso' ya'huëpirinhué'. Yosëso' inaora nohuanton, nosoroatonpoa', catahuarinpoa'. Sinioro Quisocriso anoyacancantohuachinpoa', nanpimiatarihua'.

Quisocriso imapatëhua', co huachi oshahuanacaso' pa'yatarihuahué'

6 ¹Yosë inaora nohuanton nosororinpoa' ni'ton, manta tëranta' niahua' inaora nohuanton, oshanënpoa' inquitinpoaso maré' ¿tëcarihua ti? ²¿Co naporinhué'! Quisocriso imapatëhua', chiminëhuaso pochin cancantatëhua', co huachi oshahuana-caso' pa'yatarihuahué'. ³“Quisocriso imarahué huachi,” ta'tëhua', aporihuanëhua'. Ina noya chinpitacaso maré' aporihuanëhua'. Aporihuanpatëhua', Quisocristoré'quënpoa' chiminëhuaso pochin ninëhua'. Ina chimininso pochachin co noyahué' yonquirëhuasopita a'porëhua'. Nani ina nitotërama'. ⁴Quisocriso chiminpachina, pa'pitopi. Aporintohuachinënpoa, canpoanta'

pa'pitërinënpoaso pochin co noyahuë' yonquirëhuasopita naniantërehua'. Tata Yosë chiniquën nanantaton, Quisocristo ananpitaantarín. Canpoanta' nasha cancan quëtërinpoa' nasha pochin nanpicaso marë'. Ina yonquiatëhua', aporihuanëhua'.

⁵ Quisocristo chiminaponahuë', nanpiantarin. Inapochachin canpoanta' co noyahuë' yonquirëhuasopita naniantohuatëhua', nanpiantarëso pochin noya noya cancantarihua'. ⁶ Cato' cancan pochin ya'huëtërinpoa'. A'na cancanso' sopai yanatërin. Quisocristo imarëhua' ni'ton, co noyahuë' cancantërehuaso' corosëquë patanantërehso pochin nitërehua'. Ama huachi sopai natëcaso marëhuë' napotërehua'. Co noyahuë' cancantërehuaso' chimininso pochin nitahua'. ⁷ Chimipiso' co huachi yonquirinhuë' oshahuanacaso'. Inapochachin canpoanta' Quisocristo imapatëhua', co huachi oshanënpoa hua'anëntërinpoahuë'. ⁸ Co noyahuë' cancanso' naniantohuatëhua', Quisocristo pochachin noyápiachin cancantarihua'. Ina nohuitatëhua', noya noya nanpiarëhua'. ⁹ Inaso' nanpiantahuachina, co huachi chimianinhuë'. Chimirin nani minsëaton, nanpimiataantarín. ¹⁰ Chimpinachina, oshanënpoa marë' chiminin. Naporo' oshanënpoa' minsërin. Iporaso' Yosëichin natëcaso marë' nanpimiataantarín. ¹¹ Inapochachin canpitanta' ama huachi oshahuanacamaso' yonquicosohuë'. Quisocristo imarama' ni'ton, Yosëichin natëco'.

¹² Ama oshanëma hua'anëntatë pochin nitatëinquëma' camayápainquëmaso nohuantocosohuë'. Ya'ipi co noyahuë' yonquiramasopita naniantatoma', noyasáchin yonquico'. ¹³ Ni'co'. Imirama', nantëma', ya'pirama', huëratëma', nanamëma', inapita ya'huëtërinquëma'.

Inapita quëran co noyahuë nicacaso ya'huëpirinhuë'. Ama nohuantocosohuë'. Yosë natëcamasoáchin yonquico'. Chiminama quëran nanpiantëramaso pochin cancantatoma', ya'ipi nonëma quëran huarë' noyasáchin nico'. ¹⁴ Inapohuatama', co huachi oshanëma hua'anëntatë pochin nitarinquëmahuë'. Co ya'ipi pënëntërinso' natëpiramahuë', inaora nohuanton, Yosë anoyacancantërinquëma'. Nosoroatëinquëma', catahuarinquëma' noya nicacamaso marë'.

Hua'anënpoa pochin nininso'

¹⁵ Tëhuëenchachin co huachi iráca pënëntërinso' natëcaso' ya'huërinhuë'. Yosë nosoroatonpoa', nicha'ërinpoa'. A'naquënso nipirinhuë' ina natanatona', co manta' yanatëpihuë'. “Noya oshahuanacaso',” toconpi. ¡Co ina pochin yonquicaso ya'huërinhuë'! ¹⁶ Insosona natëhuatëhua', inaso' hua'anëntarinpoa'. ¡Nani nitotërama' ipora! Oshanënpoa natëhuatëhua', ina hua'anëntarinpoa'. Camaihuachinpoara, co noyahuë' ninëhua'. Oshanënpoa' co a'poasëhuahuë' chiminpatëhua', parisitopiquë pa'sarëhua'. Nipirinhuë', Yosë natëhuatëhua', noya nicarihua'. ¹⁷ Iráca oshanëma natëtoma', co noyahuë' nipiramahuë'. Quisocristo nanamën a'chintohuachinëinquëmara, noya natanama'. Ya'ipi cancanëma quëran noya natërama'. Ina yonquiatëhua', “Yosparinquën” itërehua' Yosë. ¹⁸ Iporaso', co huachi oshanëma camaiarinquëmahuë'. Nasha hua'anëma' ya'huëtërinquëma'. Quisocristo natëtoma', noya nisarama'. ¹⁹ Iso pochin a'chintaranquëma' noya noya nitotacamaso marë'. Canpitaora co nitotëramahuë'. Iracaso' ya'ipi nonëma quëran huarë' oshahuanacasoáchin pa'yatërama'. Inapohuatamara, pa'pi nishinahuën' cancantërama'. Iporaso'

noyasáchin nico'. Inapohuatama', noyápiachin cancantarama'.

²⁰Íráca oshanëma natëhuatamara, co noyahuë' ninama'. Co yonquiramahuë' noya nicacamaso'. ²¹Inapohuatamara, ¿ma'ta' ina marë' canarama'? Co ina marë' canamiataramahuë'. Topinan quëran ya'huërama'. Ina pochin cancantohuatama', chiminpatama', parisitopiquë pa'sarama'. Íráca ina pochin nipiramahuë', iporaso ina marë' tapanama'. ²²Iporaso nipirinhüë' co huachi oshanëma hua'anëntërinquë-mahuë'. Yosë nicha'ërinquëma' ama huachi oshahuanacamaso marëhuë'. Ina chachin hua'anëntërinquëma'. Napoaton noyápiachin cancantarama'. A'na tahuëri Yosë'pa' nanpimiatarama'. ²³Piyapi asacatohuatëra, pahuërerë'. Inapochachin co noyahuë' nipatëhua', chiminpatëhua' parisitomiatarihua'. Yosëso nipirinhüë', inaora nohuanon nosororinpoa'. Quisocristo imapatëhua', ina nohuitatëhua', nanpimiatarihua. Inaso' hua'anënpoa'. Inasáchin natërehua'.

Sa'arinso pochin nininso'

7 ¹Canpitaso' iyaro'sa', pënëntopiso' nitotërama'. Nanpipisopitaráchin camaitërinso' natërapí. ²⁻³Ni'co'. Sanapi so'yahuachina, so'in chinpitacaso' ya'huërin. So'in ya'huëtopirinhüë', a'na quëmapiri sé'huahuachin, monshihuanin. Ina marë' oshahuanarin. Nipirinhüë', so'in chiminpachin, so'yaantahuachin, co ina marë' oshahuaninhüë'.

⁴Inapochachin iyaro'sa', canpoanta' Quisocristorë'quënpoa' chiminëhuaso pochin ninëhua' ni'ton, co huachi íráca pënëntërinso' hua'anëntiinpoaso' ya'huërinhuë'. Quisocristo chinpitacaso' ya'huërin. Inaso chiminaponahuë', nani nanopiantarin. Ina imamiatohuatëhua',

noya nicarigua' a'napitanta' Yosë noya yonquicaiso marë'. ⁵Íráca, canpoara nipa'yatacasoáchin yonquirëhua'. Co noyahuë' cancantërehua'. Pënënpachinënpoara, aquë aquëtë' co noyahuë' yonquiatëhua', co noyahuë' ninëhua'. Ina marë' chiminpatëhua', parisitomiatacaso' ya'huërin. ⁶Íráca nisha nisha pënëntërinso' ya'huërin natëcaso', Moisésëri ninshitërinso'. “Co ya'ípiya natëhuatëhuahuë', co onporonta' cha'ësarëhuahuë',” topi. Apina'pi tashinan pëiquë ya'huërinso pochin nipirëhuahuë'. Iporaso' co huachi Moisésë pënëntërinso' yonquiarëhuahuë'. Quisocristorë'quënpoa' chiminëhuaso pochin ninëhua' ni'ton, co huachi hua'anëntiinpoaso' ya'huërinhuë'. Ispirito Santo catahuarinpoa' cancanënpoa quëran huarë' Yosë natëcaso'. Nasha cancan quëtërinpoa'. Napoaton noya nisarëhua'.

Co noyahuë' yonquirëhuasopita yaminsërinpoaso'

⁷Napoahuarë', “Moisésë pënëntërinso' aoshahuaninpoa' ni'ton, co noyahuë',” ¿tëcarihua' ti? ¿Co naporinhüë'! Napoaponahuë', pënëntërin quëran oshahuanëhuaso' nitotërehua'. Iso pochin yonquia'ahua'. “Ama a'na piyapi ma'shanëna' noyapatocosohüë',” ténin íráca pënëntaton. Caso' ina natanato, “Tëhuëenchachin a'napita ma'shanën noyapatato, co noyahuë' yonquirahuë'. Ina marë' oshahuanahuë',” tënahüë. ⁸“Ama ma'sha noyapatocosohüë',” itërinco. Ina natanato, aquë aquëtë' a'napita ma'shanëna' noyapatërahuë'. Co noyahuë' cancantërahuëso' canarínco. Íráca oshahuanpirahuë'. Co'huara pënëntërinso' nitochatërasocohüë', oshahuanahuëso' co nitotërahuë'. ⁹Co'huara pënëntërinso' natayantërasocohüë',

“Caso' noya piyapico,” topirahuë'. Pënëntërinso' natanpatëra, “Tëhuënchachin oshahuanco. Chiminpató, Yosë ana'intarinco,” ténahuë'. ¹⁰Noya ya'huëca'huaso marë' pënënpirincóhuë'. Co ina natëtorahuë', oshahuanahuë'. Oshahuanato, parisitopiquë paca'huaso' ya'huërin. ¹¹Pënëntërinso' natëhuato, noya cancantarahuë', topirahuë'. Co ina natërahuë' ni'ton, oshahuanahuë'. Chiminpató, ana'intincoso' ya'huërin.

¹²Yosë chachin pënëninpoa'. Sha'huitërinpoaso' nóya. No'tëquën nonin. ¹³Napoahuarë' pënëntërinso' noya nipirinhüë', ina marë' ana'intarinco, ¿topiramahuë' ti? ¿Co pënëntërinso marë' ana'intincoso' ya'huërinhuë'! Oshahuanahuë' ni'ton, ana'intincoso' ya'huërin. Pënëntërinso' noya nipirinhüë' natanahuë' quëran aquë aquëtë' co noyahuë' yonquiato, co noyahuë' ninahuë'. Pënëninpoa quëran oshahuanahuëso' nitotërahuë'. Pa'pi co noyahuë' ninahuë', ténahuë'.

¹⁴Noya yonquicaso marë' pënënpirincóhuë'. Caso' co noya yonquiatohuë', oshahuanahuë'. Oshahuanahuëso' hua'anëntatë pochin nitërinco. Co nanitërahuë' noya nica'huaso'. ¹⁵Noya nisarahuë', topirahuë', a'naróachin co noyahuë' yaninahuë'. Co yaoshahuanpirahuë', oshahuanahuë'. Onpoatoso' napomaraco, co nitotërahuë'. ¹⁶Co nohuantopirahuë', co noyahuë' ninahuë'. Ina marë' co noya cancantërahuë'. Yonquinëhuë' quëran nitotërahuë'. Tëhuënchachin pënëntërinso' noya, ténahuë'. ¹⁷Co nohuantopirahuë', caora co noyahuë' cancantato, co noyahuë' ninahuë'. Co noyahuë' cancantërahuëso' canarinco. ¹⁸Caora co noyahuë' cancantërahuë'. Co nanitërahuë' noya nica'huaso'. Inachinco. Yosë yanatëpirahuë', caora co nanitërahuë' natëca'huaso'. ¹⁹Noya

nica'huaso' nohuantopirahuë', co noyahuë' ninahuë'. Co yaoshahuanpirahuë', oshahuanahuë'. ²⁰Co nohuantopirahuë', co noyahuë' ninahuë'. Co noyahuë' cancantërahuëso' canarinco.

²¹Noya nica'huaso' nohuantopirahuë', co noyahuë' cancantato, co noyahuë' nica'huasoráchin yonquiconahuë'. ²²Cancanëhuë' quëran Yosë pënëninpoaso' pa'yatato, yanatëpirahuë'. ²³A'na cancan nohuantërin. A'na cancanso nipirinhüë', co nohuantërinhuë'. Co noyahuë' nicacasoáchin yonquirin. Ina canarinco ni'ton, co noyahuë' ninahuë'.

²⁴¡Ma'huantacha caso' ninahuë' paya! ¿Incha ipora nicha'ëinco co noyahuë' yonquirahuëso' nanianta'huaso marë'? ténahuë'. ²⁵¡Yosëfchin nanitaparin! Sinioro Quisocristo imarahüë' ni'ton, ina catahuarinco. Ina marë': “Yosparinquën Tata Yosë,” itërahuë'. Tëhuënchachin cancanëhuë' quëran Yosë yanatëpirahuë', co noyahuë' cancantato, co noyahuë' ninahuë'.

Ispirito Santo catahuarinpoaso'

8 ¹Napoaton iporaso' Quisocristo imapatëhua', co huachi ana'intinpoaso' ya'huërinhuë'. ²Oshanënpoa natëhuatëhua', co noyahuë' ninëhua'. Inapohuatëhua', chiminpatëhua', ana'intarinpoa'. Nipirinhüë', Quisocristo imapatëhua', Ispirito Santo catahuarinpoa' nanpimiatacaso marë'. Naporahuaton, co huachi oshanënpoa natëcaso' ya'huërinhuë'. ³Íráca Yosë pënënpirincóhuë'. Co noyahuë' cancantatëhua', co nanitërehuahuë' no'tëquën natëcaso'. Ina quëran hui'nin chachin isoro'paquë' a'paimarin. Piyapi chachin nasitimarín. Co oshahuana-ponahuë', oshanënpoa' inquitinpoaso marë' chiminin. Inapoaton, nicha'ërinpoa' ama huachi ana'intinpoaso

marëhuë'. ⁴Co noyahuë' yonquirëhua-sopita naniantatëhua', Ispirito Santo natëhuatëhua', catahuarinpoa' noya nicacaso'. Ina pochin cancantohuatëhua', Yosë noya ni'sarinpoa'. Ina marë' hui'nin a'paimarin.

⁵Co noyahuë' yonquihuatëhuara, co noyahuë' nicacasoáchin pa'yatërehua'. Nipirinhuë', Ispirito Santo natëhuatëhua', Yosë nohuantërinsoáchin pa'yatarëhua'. ⁶Co noyahuë' nicacasoaráchin pa'yatohuatëhuara, chimipi pochin niconëhua'. Co Yosë nohuitërehuahuë'. Nipirinhuë', Ispirito Santo pa'yatatëhua' natëhuatëhua', Yosë nohuitatëhua', nanpimiatarihua'. Noya yonquiatëhua', sano cancantarihua'. ⁷Co noyahuë' nicacasoaráchin pa'yatohuatëhua', Yosë inimicotarëhua'. Co Yosë pënëntërinso' natëcaso' nohuantarëhuahuë'. Co nanitarëhuahuë' ina natëcaso'. ⁸Ina pochin cancantohuatëhua', co Yosë noya ni'sarinpoahuë'.

⁹Canpitaso nipirinhuë' co noyahuë' yonquiramasopita naniantërama'. Ispirito Santo ya'coancantohuachinquëma', ina nohuantërinso' nisarama'. Co Ispirito Santo ya'coancantohuachinquëmahuë', co tëhuëenchachin Quisocriso imaramahuë'. ¹⁰Oshahuanama' ni'ton, nonëmaso chiminacaso' ya'huërin. Napoaponahuë Quisocriso ya'coancantatënquëma', anoyacancantërinquëma'. Napoaton Yosë noya nicatënquëma ispiritonëma ananpitarin ni'ton, nanpimiatarama'. ¹¹Ispirito Santo ya'coancantërinpoa'. Yosë hua'-yanën chachin ni'ton, achinicancaninpoa' Yosë pochin cancantacaso marë'. A'na tahuërinta' Yosë ananpitaantarinpoa'. Quisocriso ananpitaantarinso' pochachin ananpitaantarinpoa' canpoanta'. Nonënpoa' chiminacaso ya'huëpirinhuë', Ispirito Santo ya'coancantërinpoa' ni'ton, nanopiantarihua'.

¹²Napoaton iyaro'sa', Ispirito Santo natëcaso' ya'huërin. Co noyahuë' yonquirëhuasopitaso' naniantahua'. ¹³Co noyahuë' ninëhuasopita co a'poasëhuahuë', chiminpatëhua' parisi-tomiatacaso' ya'huërin. Nipirinhuë', co noyahuë' ninëhuasopita tëpatë pochin nitohuatëhua', nanpimiatarihua'. Ispirito Santo catahuarinpoa' co noyahuë' ninëhuasopita tëpatë pochin nitacaso marë'.

¹⁴Ispirito Santo nohuantërinso' natëhuatëhua', Yosë hui'ninpoa chachin nisarëhua'. ¹⁵Iráca Yosë të'huatërama'. Iporaso nipirinhuë' Ispirito Santo ya'coancantërinpoa' ni'ton, co huachi manta' të'huatacaso' ya'huërinhuë'. Hui'ninpita pochachin Yosë ni'ninpoa'. Ina nontohuatëhuara, "Tata," itërehua'. ¹⁶Ispirito Santo chachin cancanënpoa quëran anitotërinpoa'. "Hui'ninpita pochachin Yosë ni'ninquëma'," itërinpoa'. ¹⁷Hui'ninpoa' ni'ton, na'con na'con catahuarinpoa'. A'na tahuëri ya'huërin'pa' noya acoarinpoa'. Quisocriso noya acorinso pochin acoarinpoa' canpoanta'. Ina imarëhuaso marë' aparisitopirinënpoahuë', inapochachin inarë'quënpoa' noya noya ya'huëcon-tarihua'.

A'na tahuëri ya'ipiya anoyatarinso'

¹⁸Isoro'paquë pi'pian parisitarihuarahuë', ama ina yonquia'ahuasohuë'. Ama ina marë' sëtahuasohuë'. A'na tahuëri Yosë'pa' noya noya ya'huëcontarihua'. Ina yonquiatëhua', nóya cancantahua' ténahuë. ¹⁹Naporo' Quisocriso imarëhuasopita noya noya ya'noarihua'. Ya'ipi ma'sha isoro'paquë ya'huërinso-pitanta' ina tahuëri ninarapi. ²⁰Iporaso nipirinhuë' sharo'sa' co noyatopihuë'. Ma'sharo'santa' chiminpi. Nipirinhuë', co

inahuara nohuanton, napopihuë'. Yosë nohuanton, napopi. A'na tahuëri ya'ipiya anoyatarin. ²¹Naporo' co huachi ma'sha chanatarinhuë'. Yosë hui'ninpitanpoa ninëhuasopita noya noya acohua-chinpoa', ma'sharo'santa' noya noya niantapi. Co huachi chiminaponahuë'. ²²Iraca quëran huarë' ma'sharo'sa' parisitopi. Sharo'santa' papotopirinhuë', co noyatërinhuë', chiminin. Ipora huanta' sanapi hua'hua iquitohuachina, iquitërinso pochin chiniquën parisitapi. ²³Canpoanta' Ispirito Santo nani ya'coancantopirinpoahuë', parisitërhua'. Parisitatëhua', manorëhua' nasha nonënpoa' ya'huëtinpoaso marë'. Ina ninarëhua'. Nasha nonënpoa' quëtohuachinpoa', co huachi caniorihuahuë'. Co huachi chiminarihuahuë'. Naporo' Yosë hui'ninpita chachin nisarëhua'. ²⁴Tata Yosë noya nicha'ërinpoa'. Napoaponahuë', co ya'ipi naniyatërarinhuë': "A'na tahuëri noya noya acoarinpoa'," ta'tëhua', ina ninarëhua'. Pahuanarin ya'ipi nanicaso'. Napoaton ninarëhua'. Nani nanirin naporini, co ninacaso' ya'huë'itonhuë'. ²⁵"Tëhuëinchachin noyá nicha'ësarinpota'," ta'tëhua', co sëtërhua'huë'. Noya cancantatëhua', ninarihu'a'.

²⁶Iporaso' co chiniquën cancantopirëhuahuë', Ispirito Santo catahuarinpoa'. Yosë nontohuatëhuara, co nitotërhua'huë' ma'sona itacaso nipirinhuë', catahuarinpoa'. Cancanënpoa quëran inari Yosë nontërin. Tarëtarinso pochin ninin. Canpoaso' co natanpirëhuahuë', Yosëriso' natanin. ²⁷Ya'ipi yonquirëhuasopita Yosë nitotërin. Ispirito Santori nontohuachina, natanin. Yosë nohuantërinso chachin nitotaton, canpoa marë' noya nontërin.

Yosë nosororinpoaso'

²⁸Yosë nosorohuatëhua', noyasáchin yonquirinpoa'. Ma'sha onpohuatëhuara,

na'con catahuarinpoa'. Pi'pian parisitapirëhuahuë', ina nohuanton, parisitërhua quëran noya noya pipiarëhua'. Achinicancaninpoa' ni'ton, noya noya imarihua'. Nani huayoninpoa' ina nohuantërinso' nicacaso marë'. ²⁹Iraca quëran huarë' Yosë nohuitërinpoa'. Nohuitatonpoa', huayoninpoa' Quisocristo pochachin cancantacaso marë'. Quisocristoso' noya noya ninin. Ina quëran na'aquënpoa' imapatëhua', ina pochin cantarihu'a'. Yosë hui'ninpita pochin ni'sarinpoa' canpoanta'. ³⁰Nohuantërinpoa' ni'ton, huëntonënuë chachin aya'coninpoa'. Oshanënpoa' inquitatonpoa', noya ni'ninpoa'. Ina nohuanton, a'na tahuëri inápaquë noya noya acoarinpoa'.

³¹Ina pochin Yosë yonquirinpoa' ni'quëhuarë', co insonta nanitërinhuë minsëinpoaso'. ³²Yosë chachin nosoroatonpoa' co hui'nin tëranta' apiratërinpoahuë'. Isoro'paquë a'paimarin chiminacaso marë'. Canpoa marë' chiminin. Ipora chachinta' nosoroatonpoa', catahuarinpoa'. ¡Quisocristo imarëhua' ni'ton, co manta' pahuantarinpoahuë' Yosë pochin cancantacaso marë'! Noya nicha'ësarinpota'. ³³Yosë huayoninpoa' ni'quëhuarë', co insonta nanitërinhuë sha'huirapinpoaso'. Yosë chachin noya ni'ninpoa'. ³⁴Yosë noya ni'ninpoa ni'ton, co insonta nanitërinhuë ana'intinpoaso'. Quisocristo oshanënpoa' inquitinpoaso marë' chiminin. Ina quëran nanopiantarin. Yosë inchinanën quëran ya'huaton, canpoa marë' Yosë nontárin. ³⁵Tëhuëinchachin Quisocristo nosororinpoa'. Co insonta' nanitërinhuë ina quëran osëreinpoaso'. A'na tahuëri parisitërhua'. Parisitatëhua', co napion cancantërhua'. Piyapi'sa' aparisitërinënpoa'. Cosharo', ma'sha inapita pahuantërinpoa'. Ma'sha onpochináchin

nisarëhua'. Yatëparinënpoa'. Inapopirëhuahuë', ¡co inapita nanitapihuë' Quisocristo quëran osëreinpoaso'!

³⁶Yosë quiricanënguë naporin:

“Imarainquënso marë' Sinioro,
ya'ipi tahuëri yatëparinacoi.
Co manta' onpopiraihuë', ohuicarosa' yatëpapiso pochin yatëparinacoi,” ténin.

³⁷Ina nipirinhüë', Quisocristo nosororinpoa'. Parisitapirëhuahuë', nani tahuëri catahuarinpoa' sopai minsëcaso marë'. Nóya cancantarëhua'. ³⁸Yosë nosoromiatërinpoa'. Nanpihuatëhuara, nosororinpoa'. Chiminpatëhuanta', co patarinpoahuë'. Anquëniro'sa', sopairo'sa', tanan hua'yano'sa', inapita co nanitopihuë' Yosë quëran osëreinpoaso'. Ipora tahuëri'sa' ma'sha onpotopirinënpoahuë', co patarinpoahuë'. A'na tahuërinta' ma'sha onpotohuachinënpoa', co Yosë naniantarinpoahuë'. ³⁹Ma'sha inápaquë ya'huërinso pita, acoporoquë ya'huërinso pita inapita co nanitopihuë' Yosë quëran osëreinpoaso'. ¡Co insonta' nanitërinhuë' Yosë ananiantinpoaso'! Quisocristo hua'anëntërinpoa'. Ina imarëhua' ni'ton, Yosë nosoromiatërinpoa'.

Yosëri israiro'sa' huayoninso'

9 ¹Quisocristo imato, no'tëquën nonahuë. Co nonpinahuë'. Espirito Santo ya'coancantërinco ni'ton, no'tëquën nontaranquëma', tënahüë. ²Tëhuënhachin israiro'sa' yonquiato, sëtërahuë. Cancanëhuë quëran huarë' sëtárahüë. ³Inapitaso' quëmopinëhuëpita. Co Quisocristo imapihuë' ni'ton, ana'intacaso' ya'huërin. Nanitërahuë naporini, inapita ya'huërenamën parisitopiquë pa'itohuë'. Cha'ëcaiso marë' inaquë parisichitohuë'. ⁴Piyapinënpita nicacaiso marë' Yosëri acorin. Israiro

shinpita nipi. Iráca quëran huarë' Yosëri nohuantërin ni'ton, hui'ninpita pochin nicacaiso marë' acorin. Huënaráchin huënaráchin a'pintohuachina, shimashonënpitari quënanpi. Iráca chachin piyapinënpita nicacaiso marë' inapitarë' anoyatërin. Naporahuaton, pënëntërinso nanan sha'huitërin. Noya chinotacaiso marënta' a'chintërin. Na'con sha'huitërin nicha'ëcaso marë'. ⁵Shimashonënpitaso' Yosëri chachin huayonin. Ina quëran Cristo isoro'paquë o'mahuachina, Israiro sanapi quëran nasitërin. Inaso' Yosë chachin. Ya'ipiya hua'anëntërinpoa'. ¡Ma noyacha inaso paya! tënëhua'. Amen.

⁶Na'con nitotaponaraihuë', notohuaro' israiro'sa' co Yosë natëpihuë'. Napoaponahuë', Yosëri co topinan quëran sha'huitërinhuë' nicha'ëcaso marë'. Co ya'ipi israiro'sa' piyapinënpita pochin ni'ninhüë'. ⁷Apraan cato' hui'ninpita ya'huëtopirinhüë', a'naíchin Yosëri acorin Apraan ya'huëretacaso marë'. “Isaco huayonahuë. Shinpitanta' piyapinëhuëpita pochin ni'sarahüë,” ténin Yosë. ⁸Napoaton co ya'ipi Apraan hui'ninpita Yosë piyapinënpita nipihuë'. Yosëri sha'huitërinso chachin nasitohuachina, piyapinënpita pochin ni'nin. ⁹Iráca Yosëri Apraan itapon: “A'na pi'ipi quëran nicaponquën huëantarahuë. Naporos' ca nohuanto, sa'an hua'huanarin,” itërin. Naporinso chachin tahuëri nanihuachina, Isaco nasitërin, Yosëri acorinso'.

¹⁰Naporahuaton, Tata Isaconta' cato' hui'nahuanin. Sa'in Nipica itopiso' yahuaihuachina, Yosëri itapon: ¹¹⁻¹³“Hua'hua nininso' chini chiniquën nanantarin. Paninanso' co onpopinchin chiniquën nanantaponhuë’,” itërin. Ina quëran itantarin: “Cacopo nosoroato, huayonahuë. Isaoso

nipirinhuë' co onpopinchin nohuan-tërahuë'," ténin Yosë quiricanënguë. Co'huara nasichátërasoihuë', naporin. Co ya'huëyátërasoihuë', yonquiaton, huayonin. "Noya nininso marë' Yosëri huayonin," topiramahuë', co ina marë' huayoninhuë'. Inaora nohuanton, huayonin.

¹⁴Naporin ni'quëhuarë' ¿ma'ta' tēcarihua'? "Yosëso' co napopináchin ni'ninpoahuë'," ¿tēcarihua ti? ¿Co naporinhuë'! ¹⁵Íráca Yosëri Moisésë itërin: "Caora nohuanto, nosororahuë. Insosona nohuantohuato, huayonahuë," itërin. ¹⁶Napoaton co canpoara nohuanton, Yosë huëntonënguë ya'conëhuahuë'. Noya nipirëhuahuënta', co canpoara nanitërehuahuë' ya'conacaso'. Inaora nohuanton, Yosë aya'coninpoa'. Nosoroatonpoa', aya'coninpoa'. ¹⁷Íráca Iquipito copirinoso' co noyahuë' cancantopirinhuë', Yosëri huayonin hua'anëntacaso marë'. "Piyapinëhuëpita hua'anëntopiranhuë', nicha'ësarahuë noya pipicaiso marë'. Ina quëran na'a piyapi'sa' nicatona', 'Ma noyacha Yosëso' nanitaparin paya. Copirno co nohuantopirinhuë', piyapinëpita nicha'ërin,' tosapi," ténin. Quiricanën quëran sha'huitërinpoa'. ¹⁸Inaora nohuanton, a'naquën nosororin. A'naquënso nipirinhuë' tananpitërin. Tananpitoahuachina, co natantochiná-chinhuë' cancantopi.

¹⁹Ina natanatoma', a'naquëma' co noyahuë' yonquirama': "Yosë nohuanton, a'naquën natëpi. Co ya'ipiya natëpihuë'. Ma'sona Yosë nohuantërinsoichin nipirëhuahuë'. ¿Onpoatonta' nipachin ana'intarinpoa'? ¿Co insonta' nanitërinhuë' Yosë nohuantërinso' canpiacaso'!" toconama'. ²⁰¿Maquëma cháchinta' ni'toma', nanitërama' Yosë chachin pinocamaso'? Ni'co'. Piyapi tëshitohuachina, minë', huë'ëta, inapita

ninin. Nipachina, co tëshiri hua'anën no'huirinhue'. "¿Onpoatonta' naponin ninanco?" co itërinhuë'. ²¹¿Co'ta tëshitona'pi no'pa' mapachina, ma'sona nohuantohuachina, ninin! Nohuantohuachina, a'naquën ninshirayarin. A'naquënso' topinanaya. Inapochachin Yosëso' yonquirinpoa'.

²²A'naquën co natëpihuë' ni'ton, Yosëri no'huirin. No'huipiro' nipirinhuë', co a'naroáchin ana'intërinhuë', ninararin. Co a'naroáchin ana'intoahuachinahuë', co ina marë' Yosë no'huicaso' ya'huërinhuë'. Oshaquëran ana'intarin. Ina ni'pachina', "Tëhuëenchachin Yosë no'tëquën yonquirin. Hua'qui' tananpitopirinhuë', iporaso' no'tëquën ana'intërin. Chini chiniquën nanantërin inaso'," tosapi. ²³A'naquënpoaso nipirinhuë', nosoroatonpoa' nicha'ësarinpooa'. Inaora nohuanton, nosororinpooa'. Iráca chachin yonquirinpoa' nicha'ëinpoaso marë'. Anoyacancantohuachinpoa', piyapi'sa' na'con Yosë yonquiapi. "Ma noyacha catahuarin paya," tosapi. ²⁴A'naquën cotio piyapi'sacoi huayonincoi. A'naquëma' nisha piyapi'sanquëmanta' Yosë nohuanton, imarama' canpitanta'. ²⁵Inapochachin iráca Osiasë ninshitërin.

"A'naquën iráca co piyapinëhuëpitahuë' nipirinahuë', iporaso' piyapinëhuëpita pochin ni'nahuë.

Íráca co nosoropirahuë', iporaso' nosororahuë huachi," ténin Yosë, itërin.

²⁶Ina quëran itantarin: "Canpitaso' co piyapinëhuëpitanquëmahuë'," itopirinhuë', iporaso' inaquë itapona': "Inapitaso' Yosë hui'ninpita chachin nisapi. Inaso' nanpimiatarin," tosapi.

²⁷Isaiasënta' ninoton, ninshitërin. "Hua'huayatërahuë' isairro'sa'

ya'huëpirinahuë!, co ya'ipiya cha'ësa-pihuë!. Marë yonsanquë inotëra'huaya ya'huërinso nápo' ya'huëpirinahuë!, caraíchín Yosëri nicha'ësarín. ²⁸Co hua'quiya quëranhuë! na'a piyapi'sa' no'tëquën ana'intarin," ténin. ²⁹Co'huara ina ninshichatërasohuë!, Isaiasë ninoton, tapon:

"Sinioro ya'ipinpoa' hua'anëntë-rinpoa'. Iráca ina nohuanton, ya'ipi Sotomaquë ya'huëpi-sopita ta'huantopi huachi. Comoraquë ya'huëpisopi-tanta' ta'huantopi.

Canpoanta' caraíchín nipurëhua-huë! nosoroatonpoa', nicha'ë-rinpoa'. Co nosororinpoahuë! naporini, canpoanta' ya'ipin-poa' ta'huanchitërihuahuë!," ténin.

Israiro'santa' noya nanan natëcaso' ya'huërinso'

³⁰Napoahuarë! ¿ma'ta' tëcarihua'? ténahuë yonquiato. Nisha piyapi'sa' hua'qui' co Yosë yonquipirinahuë!, inari anoyacancantërin. "Yosë no'tëquën nonin," ta'tona' natëpi. Napoaton noya ni'nin. ³¹Israiro'saso nipirinhuë! taponal: "Moisësë pënëntërinso' natëhuatëhua', Yosë noya ni'sarinpoa'," topirinahuë!. Co nanitopihuë! no'tëquën natëcaso' ni'ton, co Yosëri noya ni'ninhuë!. ³²¿Onpoatonta' co noya ni'ninhuë'? "Pënëntërinso' nanan no'tëquën natëhuatëhua', nóya cancantarëhua!," topirinahuë!, co nani-topihuë!. "Yosëíchín nanitërin anoyacancantínpoaso!," ta'caiso nipirinhuë!, co Quisocriso nohuantopihuë!. Inapoatona', pancara'pi i'patëreso pochín ni'pi. Ina marë! Yosëri co noyahuë! ni'nin. ³³Yosë quiricanën quëran naporin:

"Sionquë Cristo a'papurahuë!, co nohuantopihuë!.

Inapoatona' pancara'piquë i'parëso pochín ni'pi. Co nohuantopihuë! ni'ton, anotëreso pochín nipi.

Nipirinhuë!, insosona Cristo nohuantohuachín, co onpo-ronta' atapanarahuë!. Noya ni'sarahuë huachi," ténin Yosë.

10 ¹Pa'pi nohuantërahuë israiro'sa' cha'ëcaiso!. Ina marë! iyaro'sa', chiníquën Yosë nontárahüë. ²Tëhuën-chachín Yosë yachinotopirinahuë!, co nanamën no'tëquën yonquipihuë!. ³Yosëíchín anoyacancantërinpoa'. Nipirinhuë!, co nohuantopihuë! ina nanan imacaiso!. "Pënëntërinso' natëhua-tëhua', Yosë noya ni'sarinpoa!," toconpi. "Quëma Sinioro anoyacancantocoi," co itopihuë!. ⁴Iráca Moisësë pënëntërin. Iporaso nipirinhuë! co ina natëre-huaso marë! Yosë noya ni'ninpoahuë!. Quisocriso nani o'marin oshanënpoa' inquitinpoaso marë!. "Quisocrisoíchín anoyacancantarínpoa!," topatëhua!, Yosë noya ni'sarinpoa!.

⁵Moisësëri ninshitërin pënëntërinso nanan imacaiso marë!. "No'tëquën natë-huatama!, Yosë noya ni'sarínquëma!. Ya'ipiya natëcaso' ya'huërin," ténin ninshitatón. ⁶Canpoaso nipirinhuë! Quisocriso imapatëhua!, Yosë noya ni'sarinpoa!. Quisocriso nanamënso' co sacaiyahuë! nitotacaso!. "¿Inta inápaquë pantapon Quisocriso quëma-caso marë'?" co ta'caso' ya'huërinhuë!. Nani o'marin. ⁷"¿Inta' chimipiro'sa' ya'huëpíquë papon ina quëran Cristo quënantacaso marë'?" co ta'caso' ya'huërinhuë!. Nani nanpíantarin.

⁸¿Ma'ta' quiricanën quëran anitotë-rinpoa'? "Ina nananso!, co sacaihuë! nitotacaso!. Nanamënpoa quëran sha'huicaso ya'huërin. Cancanënpoa quërantal,

natëcaso ya'huërin," itërinpoa'. Inasáchin natëco', itëranquëma' canta'. ⁹Tata Yosë nohuanton, Quisocristo tëhuënchachin nãpïantarín. Ina cancanënpoa quëran natëhuatëhua', "Quisocristoíchin imarahüë," topatëhua', Yosë anoyacancantarínpoa'. ¹⁰"Yosë co onporonta' nonpïantarínpoahuë'," ta'tëhua', cancanënpoa quëran natëhuatëhua', noya ni'sarinpoa'. "Caso' Quisocristo imarahüë," topatëhua', naporo chachin anoyacancantarínpoa'.

¹¹"Insosona Quisocristo natëhuachin, co sëtarínhuë'. Co a'poarahuë'," ténin Yosë quiricanënquë. ¹²A'naíchin Yosë ya'huërin. Ya'lipínpoa' hua'anëntërinpoa'. Co cotioro'saráchin na'con nosororínhuë'. Nisha piyapi'santa' nosororín. Ina nontohuatëhua', nóya catahuarínpoa'. ¹³"Oshanëhuë Siniro inquitoco," topatëhua', anoyacancantatonpoa' nicha'ësarínpoa'. ¹⁴Napoaponahuë', co a'chintohuatëhuahuë', co nitotapíhuë'. Co nitotohuachínahuë', co nanítapíhuë' natëtacaiso'. Co natëtohuachínahuë', co nanítapíhuë' Yosë nontacaiso'. Napoaton a'chintacaso' ya'huërin. ¹⁵Co Yosëri a'china'piro'sa' a'pahuachínhuë', ¿onpo nitotaponata'? Yosë quiricanën quëran naporín: "Ma noyacha ni'ton, noya nanan sha'huitaonpoa' huë'sarin paya," ténin.

¹⁶A'naquënso nípírinhuë', noya nanan natanpírinahuë', co nanítopíhuë' natëcaiso'. "Nanamën Siniro, sha'huitopírahuë' co insonta natëtërinhuë'," ténin Isaiasë iráca. ¹⁷Quisocristo nanamën natanacaso' ya'huërin. Natanpatëhua': "No'tëquën nonín," topatëhua', natëtaríhua'.

¹⁸¿Co natanpíhuë' tí? ¡Nani miní natanpí! ténahuë. Yosë quiricanënquë naporín:

"Nisha nisha partí nanamën sha'huitopí.

Ya'ipí partí nahuínin," ténin Yosë quiricanënquë.

¹⁹Naquëranchin nataínquëma'. Israiro'saso' natanaponaraihuë', ma'sona tapon naporínso' ¿co nitotopíhuë' tí? Nitotaponaraihuë', co natëpíhuë'. Moisésë ninshítaton, naporín:

"Nisha piyapi'sa' co yonquipírinacohüë' catahuararahuë' ni'ton, canpitarísó' a'pítarama'.

Ina marë' no'huitarama', ténin Yosë," itërin.

²⁰Isaiasënta' co të'huatonhuë', Yosë nonínso' sha'huírín.

"Nisha piyapi'sa' co yanohuitopírinacohüë', íporaso' ímasarínaco.

Co íráca nohuantopírinacohüë', íporaso' nohuitarínaco, ténin Yosë," itërin.

²¹Israiro'saso' nípírinhuë' co yanatëpíhuë'. Inapíta yonquíaton, Isaiasë quëran taantarín: "Íráca quëran huarë' yacatahuarahuë. Ímirahuë íhuëtátë pochín nitato: 'Huëco' catahuainquëma', ítopírahuë', co yanatërinacohüë'. Co natantochínáchinhuë' cancantopí, ténin Yosë," itërin.

Israiro'sa' huayonínso'

11 ¹Napoaton natananquëma': ¿Israiro'sa' co natëtopíso marëhuë' Yosëri a'pomiatërin tí? Co a'porínhuë'. Ípora huanta' piyapínënpíta ni'ton, nosororín. Canta' Israiro piyapíco. Tata Apraansó' shimashonëhuë. Mincamín huëntonquë nasítërahuë. ²Inapítaso', íráca Yosëri huayonahuaton acorín piyapínënpíta nicacaiso marë'. Co a'porínhuë'. Íráca Íniasë naporínso' Yosë quiricanënquë ninshítopíso' nitotërama'. Inarísó pënënpírinhuë', israiro'sarí no'huípí. Napoaton Yosë nontohuachína, inapíta sha'huírípírin. ³"Na'amiachíncoi Siniro pënëntopíraíhuë'. Co nohuantatonaraihuë', a'naquëncoi tëparínacoí. Artaroro'sa' chinota'huainquënso marë' a'mítëraisonta' tëlyatopí. Casáchin pënëntapírahuë', yatëparínaco canta!,"

itërin. ⁴Napotopirinhue', ¿ma'ta' Yosëri itantarín? "A'naquën mini mamanshi moshapi, Paaro itopiso'. Nipirinhue', ca nohuanto, canchisë huaranca quëmapi'sa' chinotarínaco. Co mamanshi moshapihue', itërin. Nani ina nitotërama'. ⁵Inapochachin iporanta' caraya pochín Yosë huëntonënguë ya'conpi. Inaora nohuanton, nosoroaton, Yosëri aya'conin. ⁶Inaora nohuanton, catahuarin. Co noya nipiso marë' catahuarin-hue'. Noya nipiso marë' huayonin naporini, co huachi inaora nohuanton, catahuacaso' ya'huë'itonhue'.

⁷Napoahuarë', ¿ma'ta' nipachín tëcaríhua'? Na'a israiro'sa' Yosë huëntonënguë yaya'conpirínahuë', co inahuara nanitopíhuë' noya cancantacaiso'. A'naquën huayoninsopitaso' Yosë nohuanton, ya'conpi. A'napitaso nipirínhue' co natantochínáchinhue' cancantopi. ⁸"Yosëri tananpitërin ni'ton, huë'ërëso pochín cancantopi. Ya'pirahua- naponaríhuë', co quënantërëso pochín nipíhuë'. Huëratëhuanaponaríhuë', co natantërëso pochín nipíhuë'. Ipora huanta' ina pochín nisapi," tënin Yosë quiricanënguë. ⁹Íráca Tapinta' tapon: "Yosë no'huipi ni'quëhuarë', ana'inchin. Nani ma'sha ya'huëtópirínahuë', co Yosë yonquípíhuë'.

Coshatatona', capa cancantapirínahuë', ina quëran chachín nitapicanaina'. Yosëri ana'inchin.

¹⁰Somaraya pochín cancantopi ni'quëhuarë', ama quënantërëso pochín cancanchinasohuë'.

Yosë nohuanton, chiníquën parísitomiachina'," tënin íráca. Inapochachín ipora huanta' nisapi.

Nisha piyapi'sa' ya'conpiso'

¹¹Napoaton natanaranquëma'. ¿Israiro'sa' co yanatëpíhuë' ni'quëhuarë' Yosëri a'pomiatërin tí? Co Yosëri

a'pomiatërinhue'. Nipirínhue', co imapihue' ni'ton, nisha piyapi'santa' Yosëri anoyacancantarín. Ina quëran israiro'saso', apiratona' yonquiapi: "Canpoanta' inapita pochín cancantohuatëhua', Yosë noya ni'sarinpoa'," tosapi. ¹²Inapita co imatonahuë' tëhuëpiso marë', iporaso' ya'ipi piyapi'sa' nanitopi Yosë huëntonënguë ya'conacaiso'. Nisha nisha piyapi'sa' niponaríhuë', Yosëri noya ni'sarin. A'na tahuëri na'a cotioro'sa' imaantahuachina', noya noya nisarin.

¹³A'naquëmaso' nisha piyapi'sanquëma'. Yosë a'parinco a'chinta'huanquëmaso marë'. Ina marë' noya cancantërahuë. Pa'sápato, a'chintaranquëma'. ¹⁴Na'aquëma' imapatama', a'naquën israiro'santa' nohuantapi imacaiso' nimara. Inapitanta' Yosëri anoyacancantarín. ¹⁵Iporaso Yosëri tananpitërin ni'ton, nisha nisha piyapi'sa' ina nohuitapi. A'na tahuëriso nipirínhue' israiro'santa' imaantahuachina', noya noya nisapi. ¿Ma pochinta' nisapi? Chimipi nanpíantarínso pochín nisapi, tënhahuë. ¹⁶Ni'co'. Pan nipachinara, ya'nán nipiso' Yosë marë' acohuachina, ya'ipi chachín noya ninin. Nara itënta' noya nipachina, së'paquëonta' noya nisarin.

¹⁷Nara quëran a'chinchinquëma'. Oripo nara së'pa' co noya nitohuachínahuë', nishítëhuatë', tëlyatëre'. Ina quëran apinapínso' oripo së'paquën tëranta' achínpitëre' papotacaso marë'. A'naquën israiro'saso' oripo nara së'pa pochín nipi. Co natëpíhuë' ni'ton, Yosëri tananpitërin. Canpitaso' nisha piyapínquëma' nípírahuhue', huëntonënguë aya'conínquëma'. Piyapínënpita pochachín ni'nínquëma'. ¹⁸Nipirínhue', ama israiro'sa' nocanco-sohuë'. Ama: "Quiyaso' noya noyacoí," tocosohuë'. Së'paquëni co nara achínirínhue'. Itëni achínirínso'.

¹⁹"Quiyanta' imaca'huaiso marë' israiro'sa' tananpitërin," tënama' nimara.

²⁰Yosëri tananpitërin mini. Nipirinhue', co ina marë' tananpitërinhue'. Co Quisocriso nohuantopihue' ni'ton, tananpitërin. Canpitanta' imarama' ni'ton, noya ni'ninquëma'. Napoaton ama inapita nocancosohue'. Ni'cona canpitanta' Quisocriso naniantotama'. ²¹Israiro'sa'ton piyapinënpita pochin ni'pirinhue', ana'intërin. Quisocriso naniantohuatama', ana'intarinquëma' canpitanta'.

²²Ma noyacha Yosëso' nosororinpoa paya. Co natëpisopitasohue' nipirinhue', chiniquën ana'intarin. Inasáchin imapatama', nosoromiatarinquëma'. Nipirinhue' naniantohuatama', ana'intarinquëma' canpitanta'. ²³Naporahuaton israiro'santa' imaantahuachina', Yosëri piyapinënpita pochin niantarin. Nara sël'para'huain achinpitantarëso pochin acoantarin. Yosë ni'ton, nanitaparin. ²⁴Nani a'chintëranquëma'. Canpitaso' apinapin nara pochin ninama'. Apinapinso' nara sël'para'huain nishitëtahuatë', oripo nara sël'para'huain achinpihuatëra, papotërin. Aquëtë huarë' sël'para'huain chachinso' achinpitaantahuatëra, a'naroáchin papoantarin. Inapochachin israiro'sa' noya imapachina', Yosëri noya niantarin.

Na'a israiro'sa' imaantapiso'

²⁵Yosë yonquirinso' iyaro'sa' sha'hui-chinquëma', no'tëquën nitotacamaso marë'. A'napita co nitotopirinahuë', ama nocantamaso marëhuë' sha'huitaranquëma'. "Quiyasáchin no'tëquën yonquirai," ama tocosohue'. Iporaso' na'a nisha piyapinquëma' Yosë huëntonënuquë ya'conarama'. Ya'ipi Yosë nohuantërinquëmasopita ya'conamaquë huarë' na'a israiro'sa' co natantochináchinhue' cancantapi. ²⁶A'na tahuëriso nipirinhue' ya'ipi israiro'santa' cha'ësapi huachi. Yosë quiricanënuquë ninorinso pochachin imaantapi. Iráca ninshitaton, naporin:

"A'na tahuëri a'nara' Israiro quëmapi Quirosarin quëran o'mararin piyapi nisha'ëcaso marë'.

Cacopo shinpita co noyahuë' yonquipiso' ananiantarin.

²⁷Oshanëna' inquitahuato, piyapinëhuëpita pochin ni'sarahuë.

Apraan sha'huitërahuëso chachin napotarahue'," tënin Yosë.

²⁸Iporaso' israiro'sa' co Quisocriso nanamën natëpihuë'. Yosë inimicotopirinahuë', canpitaso' imarama'. Napoaponahuë', israiro'sa'ton acorin piyapinënpita nicacaiso marë'. Iráca Apraan, Isaco, Cacopo, inapita sha'huitërin ni'ton, ipora huanta' shinpita nosoroarin. ²⁹Nani Yosëri sha'huitohuachin, inachachin nisarin. Co onporonta' nisha nontarinhuë'. Huëntonënuquë aya'conpachin, co onporonta' naniantarinhuë'.

³⁰Iráca co canpitaso' natëpiramahuë', co israiro'sa' nohuantopihue' ni'ton, Yosë nosoroatënuquëma', catahuarinquëma'.

³¹Iporaso' israiro'sa' co natëpihuë'. Co natëhuachinarahuë', Yosë catahuarinquëma'. Ina ni'pachina', yonquiantapona' ni'ton, a'na tahuëri inahuanta' nosoroaton, catahuaantarin. ³²Yosëri ya'ipi piyapi'sa' tananpitërin ni'ton, co natëtochináchinhue' cancantopi. Ya'ipinpoa' nosoroinpoaso marë' naporin.

³³¡Ma noyacha Yosëso' catahuarinpooa paya! ¡Ma noyacha yonquirin paya! Ya'ipiya nitotërin. Yonquirinsopita co nitotochináchinhue' ninin. Naporahuaton, ina pochin cancantacaso' co onporonta' nanitarihuahuë'. ³⁴"Co insonta inaora Yosë yonquirinso' nitotërinhuë'. ¡Co incari tëranta' nanitërinhuë' noya noya ayonquicaso!" ³⁵¡Incarita' ma'sha Yosë quëtërin ni'ton, i'huëretacaso' ya'huërin? Co incari tëranta'," tënin

quiricanenquë. ³⁶Ya'ipi ma'sha Yosëri ninin. Ina nohuanton, co ta'huantarë-huahüë'. Yosëichin pa'yatacaso marë' ya'huërhua'. Inaora nohuanton, anoyacancantërinpoa'. Ma noyacha Yosëso paya, itahua'. ¡Inasáchin chinotahua'! Amen.

Yosë marë' sacatërhüaso'

12 ¹Yosë na'con nosororinpoa' ni'ton, ya'ipi cancanëma quëran, iyaro'sa', ina imaco'. Iráca Yosë chinotihuachinara, ma'sha tëpapi. Canpitaso nipirinhüë' Yosë marë' nanpitoma', nohuantërinSORÁchin nico'. Ina yonquiatoma', nani tahuëri noyasáchin nico'. Ina Yosë nohuantërin. Inapohuatama', Yosë noya chinotarama'. ²Iporaso' notohuaro' piyapi'sa' co Yosë natëpihuë'. Ma'sharáchin yonquiatona', co Yosë yonquipihuë'. Ama inapita nonancosohüë'. Nani tahuëri Yosë nontoco' yonquirinso chachin quëchinquëma'. Ina yonquihuatama', nohuantërinso chachin anitotarinquëma'. Ina quëran noya noya cancantohuatama', noya ni'sarinquëma'.

³Yosë nosoroatonco, acorinco piyapi'sa' a'chinta'huaso'. Nani tahuëri catahuarincó. Napoaton pënënanarquëma'. Ya'ipinquëma' sano yonquico'. Ama a'napita nocancosohüë'. Yosë nisha nisha acorinpoa'. Nisha nisha catahuarinpóa' ma'sona nohuantërinso' nicacaso'. Napoaton, co a'napita nocanacaso' ya'huërinhuë'. No'tëquën yonquiatoma', ma'marësona acorinquëmaso' nitotoco'. A'naya a'nayanquëma' anitotarinquëma'. ⁴Ni'co'. Imira, nantë', ya'pira, inapita ya'huëtërinpoa'. Imira ya'huëtërinpoa' së'quëtacaso marë'. Nantë' ya'huëtërinpoa' iratacaso marë'. Nisha nisha ya'huëtërinpoa' nisha nisha nicacaso marë'. Co ya'ipiya inachachin nipihuë'. ⁵Inapochachin ya'ipi Quisocristo imarëhuasopita a'naíchin nonënpoa'

pochin ninëhua'. Ya'ipinpoa' ina imarëhua' ni'ton, ina pochin ninëhua'. Nisha nisha nitotërhüaso' niriuharahuë', nicatahuarëhua'. A'na huëntonaca ninëhua'.

⁶Yosë nosoroatonpoa', acorinpoa' nisha nisha nicacaso'. Ma'marësona acohuachinpoa', noya niahua'. A'naquën, yonquirinso chachin anitotërin sha'huicaiso marë'. Anitotihuachinquëma', ya'ipiya no'tëquën sha'huico'. ⁷Ina nohuanton, a'naquën nitotërin catahuatacaso'. Nitocatahuatohuatama', noya catahuatoco'. A'naquën nitotërin a'chinacaso'. Nitoa'chinpatama', noya a'chincó'. ⁸A'naquëonta' nitotopi achinicanacaso'. Nitotohuatama', noya cancantatoma' achinicananco' imamíachina'. A'naquëonta' ina nohuanton, coriqui, ma'sha, inapita ya'huëtópi. A'napita quëtóhuatama', ama piyapi'sa' noya nicainëinquëmaso marë' quëtocoso-hüë'. Yosë yonquiatoma', quëtoco'. “Ina nosororinco ni'ton, carinta' nosoro'i,” ta'toma', quëtoco'. A'naquëonta' ina nohuanton chachin, chiníquën nanan ya'huëtópi. Ansianohüë nipon, hua'anhuë nipon ya'conpatama', ama chirotomarahüë', noya pënëntoco'. Noya nonco'. A'naquëonta' ina nohuanton, cania'piro'sa', sa'ahuaro'sa', inapita catahuapi. Inapita nicapoma' pa'patama', noya cancantatoma', catahuaco'.

Ma'pitasona nicacaso' ya'huërinso'

⁹Ya'ipi piyapi'sa' nosoroco'. Cancanëma quëran huarë' nosoroco'. Co noyahuë' ninamasopita a'poco'. Noyasáchin nico'. ¹⁰Imaramasopita capini noya ninosoroco'. Iyaparima pochin nini'co'. Ama “Caso' noya noyaco,” tocosohüë'. A'napita noya noya ni'co'. ¹¹Ama chirotomarahüë', noya sacatoco'. Ya'ipi cancanëma quëran noya yonquiatoma', Yosë marë'

sacatoco!. ¹²“Yosë ananpitaantaripoa!” ta'toma!, noya cancantoco!. Ma'sha onpohuatama!, ama no'huitocosohuë!. Chiníquën cancantatoma!, ahuantoco!. Apira apira Yosë nontoco!. ¹³Imapisopita pahuantohuachina!, ma'sha quëtoco!. Ni'toro'sa' ya'notohuachinënquëma!, noya nontatoma!, a'caco!.

¹⁴Piyapi aparisitohuachinënquëma!, ama no'huitomarahuë!, noya nontoco!. Yosë nontoco! inahuanta! catahuacaso marë!. Ama Yosëri ana'intacaso! yonquirapicosohuë!. ¹⁵A'napita na'con yonquico!. Canpitaora ninatanamaso pochin cancantoco!. Noya cancantohuachina!, ina marë! canpitanta! noya cancantoco!. Sëtohuachina!, sëtoco!. ¹⁶Noya ninicatomata! ya'huëco!. Ama a'na piyapi tëranta! nocancosohuë!. Topinan piyapi pochin cancantatoma!, ya'ipiya catahuaco!. Ama: “Caso! na'con na'con nitotërahuë,” tocosohuë!. Ama ina pochin yonquicosohuë!.

¹⁷A'na piyapi ma'sha onpotohuachin-quëma!, ama i'huërëtosohuë!. Noya nico! a'napitanta! catahuacaso marë!. ¹⁸Ama piyapi'sa' no'huicosohuë!. No'huihuachinënquëma!, ama canpitariso! no'huicosohuë!. Onpopionta! nanan anoyatoco!. ¹⁹Nosoroatënquëma! iyaro'sa!, oshaquëran pënënanquëma!. Ama i'huërëtosohuë!. Tananpitoco! Yosëri ana'inchin. Quiricanën quëran naporin: “Co noyahuë! nipisopita cari ana'intarahuë. No'tëquën ana'intarahuë,” tënin Yosë. ²⁰Napoaton “Inimiconëma! tanahuachin, a'caco!. Yamorohuachin, o'shitoco!. Inapotohuatama!, inimiconëma! atapanarama!” tënin anta!. ²¹Ama sopai natëcosohuë!. Nani ma'sha ayonquirinquëmaso! a'pomiatoco!. Yosë yonquiatoma!, noyasáchin nico!. Inapohuatama!, sopai minsëarama!.

13 ¹Copirno acorinsopita natëco!. Yosë nohuanton, copirno, chirinchi, coisë, hua'an, inapita

ya'huërin. Co Yosë nohuantërinhuë! naporini, co inapita ya'cointonahuë!. Napoaton natëco!. ²Co copirno acorinsopita natëhuatamahuë!, Yosënta! co natëaramahuë!. Ina marë! ana'intarinquëma!. ³Noya nipatama!, co hua'ano'sa! no'huiarinënquëmahuë!. Co natëhuatamahuë!, no'huiarinënquëma! ni'ton, të'huatacaso! ya'huërin. ¿Nohuantërama! hua'ano'sa! noya nicainënquëmaso!? Noya nico! nipachin noya ni'inënquëma!. ⁴Yosëri acorin a'painënpoaso marë!. Nipirinhüë!, co noyahuë! nipatama!, të'huatoco!. Co topinan quëran chiníquën nanan quëtërinhuë!. Yosëri acorin co noyahuë! nipisopita ana'intacaso marë!. ⁵Napoaton hua'ano'sa! natëco! ana'intochinënquëma!. Isonta! yonquicaso! ya'huërin: “Yosëri acorin natëcaso marë!” ta'toma!, natëco!. ⁶Ina nohuanton, hua'ano'sa! ya'huërin noya nicacaiso marë!. Ina marë! nani tahuëri sacatapi. Napoaton pahuërëtacaso! camaitërinso! pahuërëtarama!.

⁷Ya'ipiya no'tëquën pahuërëtoco!. Hua'ano'sa! catahuacaso marë! pahuërëtacaso! ya'huëhuachina!, quëtoco!. Chiníquën nanantopi ni'ton, noya nicatoma!, natëco!.

⁸Nihuitohuatama!, a'naroáchin pahuërëtoco!. Ya'ipi piyapi nosoroco!. Inaso! na'con na'con Yosë nohuantërin. Nosorohuatama!, iráca pënëntërinso! noya natëarama!. ⁹Iráca pënëntohuachina, itërin: “Sa'ahuanpatama!, ama a'na sanapi sé'huacosohuë!. Ama tëpatocosohuë!. Ama manta! ihuatocosohuë!. Ama nonpinapicosohuë!. Ama a'na piyapi ma'shanënpita nohuantapatocosohuë!” tënin. Ninosorohuatëhua!, ya'ipi Yosë pënëninpoaso! natëarëhua!. “Quëmaora ninosororanso pochachin a'napitanta! nosoroquë!” tënin Yosë. ¹⁰A'napita nosorohuatama!, co no'huiamahuë!. Co pinosaramahuë!.

Nóya catahuarama'. Napoaton nosoro-huatama', Yosë nóya natëarama huachi.

¹¹ Ya'nán imarihua': "Pahuanarin Quisocristo o'mantacaso'," tënëhua'. Iporaso nipirinhuë' nani o'mantacaso' tahuëri ya'caritëriarin. Naporo' nicha'ë-sarinpoa'. Napoaton ama huë'ërëso pochin yonquicosohuë'. Yosë no'të-quën natëco'. ¹² Hua'qui' piyapi'sa' co noyahuë' nicatona', tashi pochin cancantopirinahuë'. Iporaso' Sinioro tahuërinën ya'caritëriarin. Napoaton ama tashi pochin cancantahuasohuë'. Sontaro'sa' hua'na quëran a'mopiso pochin tahuëri pochin cancantatë-hua', noyasáchin niahua'. ¹³ Tahuëri nipachina, a'ninquëchin ni'ton, noyasáchin ninë'. A'naquënso nipirinhuë' pitasachin pa'yatopi. Na'a tahuëri nansarápi, o'osápi, coshatápi, no'piápi. Ama pitaso' pa'yatocosohuë'. Ama no'picosohuë'. Ama pi'pisha tëranta' nimonshitacamaso' yonquicosohuë'. Ama nino'huicosohuë'. Ama a'na piyapi noyapatoma', no'huicosohuë'. ¹⁴ Sontaro'sa' hua'na a'mopiso pochin Quisocristo ya'copirinpoa' ama sopai minsëinpoaso marëhuë'. Napoaton Quisocristo na'con yonquiatoma', ina pochachin cancantoco'. Ina natëtoma', ama pi'pian tëranta' yonquicosohuë' co noyahuë' nicacamaso marë'.

Co ninocanacaso' ya'huërinsohuë'

14 ¹ A'naquënso' Quisocristo imasapirinahuë', co ya'ipi cancanëna quëran natëyátërapihuë'. "Pënëntë-rinsonta' natëcaso' ya'huërin," topi. Inapitanta' huë'pachina', noya nontoco'. "Huëco' iyaro'sa' Yosë chinotahua'," itatoma', cortoquë ichiya'conco'. Ama ninocanacamaso marë' ninontocoso-huë'. ² A'naquënso' "Quisocristoíchin

nicha'ërinpoa' ni'ton, ya'ipi cosharo' noya capacaso'," ta'tona' ya'ipi ca'pi. A'napitaso nipirinhuë'," "Nosha ca'patëhua', oshahuanëhua'," ta'tona' ya'ipi nosha a'popi. ³ Nosha ca'patama', ama nosha a'poro'sa' nocancosohuë'. Nosha a'po-huatamanta' "Nosha ca'nama' ni'ton, co noyahuë' ninama'," ama itocosohuë'. Cato chachinquëma' Yosë noya ni'ninquëma' ni'ton, ama ninapotocosohuë'. ⁴ Co a'napita piyapinën nocanacaso ya'huërinhuë'. Piyapinën noya nipa-china, co noyahuë' nipachinanta' hua'a-nëni nitotarinso'. Yosëichin ya'lipinpoa' hua'anëntërinpoa' ni'ton, no'tëquën sha'huitarinpoa'. Inasáchin nanitërin achinicancaïnpoaso'. Co canpoa capiniso' ninocanacaso' ya'huërinhuë'.

⁵ Inapochachin a'naquën: "Cotio chinoto tahuëri noya noya," topi. Naporo' tahuëri chinotatona', Yosë chinotopi. A'napitaso nipirinhuë' "Nani tahuëri noya Yosë chinotacaso'," topi. Co tahuëri imarëhuahuë'. Quisocristo imarëhuaso'. Napoaton ama nisha nisha yonquicosohuë'. A'naya a'nayanquëma' cancanëma quëran na'con yonquico' noya nicacamaso marë'. ⁶ Ma tahuërisona chinotohuatama', Yosë yonquiatoma', ina chinotarama'. Inapochachin nosha ca'patama', Yosë yonquiatoma', coshatë-rama'. "Yosparinquën, Sinioro," itërama'. Co nosha ca'na'pinquëmahuënta' Yosë yonquiatoma', coshatërama'. "Yosparinquën, Sinioro," itërama' canpitanta'. ⁷ Co canpoara nipa'yatacaso marë' ya'huërehuahuë'. Chiminpatëhuanta' co canpoara marë' chiminarihuahuë'. ⁸ Sinioro piyapinënpoa' ninëhua'. Ina natëcaso marë' nanopitëhua', ya'huërehua'. Ina yonquinpita chiminarihua'. Nanpihua-tëhuanta', inasáchin hua'anëntarinpoa'. Ina quëran chiminacaso' nipachin, ina yonquiatëhua', chiminarihua'. Inasáchin

imarëhua'. ⁹Ya'ipinpoa' hua'anëntinpoaso marë' Quisocristo chiminin. Nani chimirin minsërahuaton, chini chiniquën nanantaton, nantantarin. Napoaton nanpirëhuasopita, chiminpisopitanta', ya'ipinpoa' hua'anëntarinpoa'.

¹⁰Ayaro' tahuëri ya'ipinpoa' natanarinpoa' co noyahuë' nipsisopita ana'intacaso marë'. ¿Onpoatonta' nipachin iyaparin nocanan? Co ina pochin nicacaso' ya'huërinhuë'. Yosëichin no'tëquën anitotarinpoa'. ¹¹Iráca quiricanënguë naporin:

“Caso' Yosëco ni'to, co nonpinahuë'.

A'na tahuëri ya'ipi piyapi'sa' isonahuatona', chinotarinaco.

‘Quëmasáchin Yosënguën,’ itarinaco,” ténin Yosë.

¹²Ayaro' tahuëri nanihuachin, ya'ipinpoa' Yosë natanarinpoa'. Ma'marësona ma'sha ninëhuaso' natanarinpoa'. A'naya a'nayanpoa' no'tëquën sha'huitacaso' ya'huapon.

Noya noya imacaso marë' nicatahuahua'

¹³Napoaton ama huachi ninocancosohuë'. A'napita imapisopita catahuaco' noya cancanchina'. Ni'cona anishacancantotama'. ¹⁴Ya'ipi cosharo' noya capacaso'. Co manta' a'pocaso' ya'huërinhuë'. Siniro Quisoso imato, naporahuë. Napoaton nitotërahuë. A'naquënso nipirinhuë': “Co Yosë nohuantërinhuë' nosha capacaso',” taponaraihuë', ca'pachina', tëhuëenchachin oshahuanpi. ¹⁵Isonta' yonquico'. A'naquëma' ya'ipi cosharo' noya ca'nama'. A'naquënso nipirinhuë' co nosha ca'pihuë'. “Huëco' ina ca'ahua',” itohuatama', co noyahuë' cancantapona' nimara. “Co noyahuë' capacaso',” taponaraihuë', ca'pachina', co huachi noyahuë' cancantapi. Napoaton inapita nosoroatoma', ama napotocosohuë'.

Ama cosharoachin yonquiatoma', a'napita anishacancantocosohuë'. Inapita marënta' Quisocristo chiminin. ¹⁶Ma'sona tëranta' noya nicacaso' ya'huëpirinhuë', a'napita co noyahuë' ni'pachinënguëma', ama napocosohuë'. Ni'cona co noyahuë' nica-tënënguëma' nonapichinënguëma'. ¹⁷Yosë noya hua'anëntërinpoa'. Ina imapatëhua', noya nisarëhua'. Asanocancanarinpoa' ni'ton, co nino'huicaso' ya'huërinhuë'. Yosëso', ca'nëhuaso', o'orëhuaso', inapita co onpopinchin yonquirinhuë'. Ispirito Santo catahuarinpoa' noya cancantahuaso'. Catahuahuachinpoa', capa cancantarihua'. ¹⁸Ina pochin Quisocristo imapatëhua', Yosë noya ni'sarinpoa'. Piyapi'santa' noya ni'sarinpoa'.

¹⁹Napoaton noya ninicatëhua', ya'hua'ahua'. Nicatahuahua' noya noya imacaso marë'. ²⁰Ama ca'namaso marë' a'napita anishacancantocosohuë'. Ya'ipi cosharo' noya capacaso'. Co manta' a'pocaso' ya'huërinhuë'. Nipirinhuë', a'naquën co ina natëtonahuë', ca'pachina', co noyahuë' cancantapi. Napoaton co yaca'pachinahuë', naporo' canpitanta' tananpito' nisha cancantohuachina'.

²¹Ama manta' a'napita anishacancantacamaso' yonquicosohuë'. Ca'namaso marë', o'oramaso marë', ama inapita marë' a'napita anishacancantocosohuë'. Iyaparin pochin nosoroatoma', catahuaco' noya noya imacaiso marë'. ²²Ma'sona tëranta' nipatama', “Yosë nohuantërinso' nisarahuë,” ta'toma', noya nico'. Cancanënpoa quëran huarë: “Noya nisarahuë,” topatëhua', noya cancantarihua'. ²³Napoaponahuë': “Co Yosë nohuantërinhuë' iso cosharo capacahuaso',” tarihuarahuë', ca'patëhua', oshahuanarihua'. Ina pochin yonquiarihuarahuë' ma'sona tëranta nipatëhua', oshahuanarihua'. Nipirinhuë', “iso cosharo noya capacaso',” tëcaton ca'patan, co oshahuanaranhuë'.

Nicatahuacaso' ya'huërinso'

15 ¹Canpoaso' ya'ipi cancanënpoa quëran imarëhua'. “Quisocrisotóchin nicha'ërinpoa,” ta'tëhua', co nisha nisha yonquirëhuahuë'. A'naquënso nipirinhue' co ya'ipi cancanëna quëran natëyátërapihuë'. Inapitanta' oshaquëran pënënatëhua', catahuahua' noya imaina'. Ama canpoara nohuantërehuasoráchin yonquia'huasohue'. ²A'napita yonquiatëhua', catahuahua' noya cancanchina'. Catahuahuatëhua', noya noya imasapi. ³Quisocrisoto' co inaora nohuantërinso' yonquirinhue'. Yosëíchin natërin. Ina nontaton, itërin: “Quëma inimiconënpita Tata, no'huirinënquën. Natëranquën ni'ton, no'huirinaco canta;” itërin. Quiricanënuë naporinso chachin ninin. ⁴Íráca Yosë quiricanënuë na'con ninshitopi. Canpoanta' yonquicaso marë' napopi. “Íráca imapisopitanta' ma'sha onpoaponaraihuë', Yosë yonquiatona', ahuantopi. Yosëri noya catahuahuachina, imamiatopi. Inapochachin Yosë noya catahuarinpoo' canpoanta;” ta'caso marë' ninshitopi. ⁵Yosëso' catahuarinpoo' ya'ipiya ahuantacaso'. Ina achinicancaninpoo', ina pochin cancantacaso marë'. Ina catahuainquëma' noya ninicatoma' ya'huëcamaso marë'. Quisocrisoto naporinso pochachin nico'. ⁶Ina quëran co nisha nisha yonquiaramahue'. Napopináchin cancantatoma', nóya Yosë chinotarama'. Hui'nin chachin hua'anëntërinpoo', Quisocrisoto imarëhuaso'. “Ma noyacha Yosëso' catahuarinpoo' paya,” tosarama'.

Nisha piyapi'santa' Yosë imacaiso ya'huërinso'

⁷Quisocrisoto co nocaninpooahuë'. Ina pochin canpitanta' ninosoroatoma', ama ninocancosohue'. Nisha nisha piyapinpoo' ni'tëhua', pi'pisha

nisha inachintërehua'. Nisha nisha niriuhuarahuë', noya ninontahua'. Ina quëran “Ma noyacha Yosëri catahuarin ni'ton, ninosoropi paya,” tosapi. ⁸Íráca cotioro'sa' shimashonëna' nontaton, Yosëri itërin: “A'na tahuëri Cristo a'paimarahuë,” itërin. Napoaton Quisocrisoto a'paimarin cotioro'sa' catahuacaso marë'. Sha'huitërin ni'ton, a'paimarin. Co onporonta' nonpininhue'. ⁹Nisha piyapi'sarinta' imacaiso marë' o'marin. A'chintohuachinara, inahuanta' Yosë chinotapi. “Ma noyacha nosororinpoo' paya,” tosapi. Quiricanënuë ninshitopi. “Nisha nisha piyapi'sa' ya'huërinquë, Sinioro, chinotaranquën. Yonquiatënquën, cantararahuë;” tënin.

¹⁰Ina quëran taantarín:

“Cotioro'sa' Yosë chinotatona', noya cancantopi. Canpitanta' nisha piyapi'sanquëma' nipo-marahuë', jina chinotatoma', noya cancantoco!” tënin.

¹¹Naquëranchin taantarín:

“Tata Yosë chinotatoma': ‘Ma noyanquëncha quëmaso paya,' itoco'.

Nisha nisha piyapi'saquëmanta' ina chinotoco;” tënin.

¹²Isaiasënta' Quisocrisoto ninoton, ninshitërin.

“A'na tahuëri Quisi shiin nasitimapon.

Cotio piyapi niponahuë', mashotohuachin, ya'ipi piyapi'sa' hua'anëntarin.

Nisha nisha piyapi'sarinta' ina natëtona', ninarapi;” tënin.

¹³Yosëíchin tëhuëenchachin catahuarinpoo' chiniquën cancantacaso'. Canpitanta' catahuainquëma' nóya cancantacamaso marë'. Asanocancainquëma'. Inasáchin yonquihuatama', catahuarinquëma'.

Ispirito Santo ya'ipi nanitaparin. Catahuahuachinquëma', chini chiníquën cancantatoma', noya ninarama'.

¹⁴Canpitaso' iyaro'sa', nóya piyapinquëma'. Yosë nanamën noya nitotërama'. Napoaton nipënënamaso' nanitarama', ténahuë. ¹⁵Napoaponahuë!, chiníquën miachin pënënatënuëma', ninshitaranquëma' na'con na'con ayonquica'huanquëmaso marë!. Yosë nosoroatonco, acorinco nanamën a'china'huaso marë!. ¹⁶Quisocristo chachin a'parinco nisha nisha piyapi'sa' a'chinta'huaso marë!. Nanamën a'chintarahuë inapitanta' imacaiso marë!. A'chinato, Yosë marë! sacatarahuë. Nisha piyapi'santa' imapachina', Ispirito Santori ya'coancantarin. Noyápiachin cancan quëtarin. Ina marë! Yosëri noya ni'sarin.

¹⁷Quisocristo catahuarinco ni'ton, nóya a'chinahuë. Napoaton noya cancantërahuë. ¹⁸Quisocristo noya catahuahuachincora, nisha nisha piyapi'sa' a'chintërahuë. Ina nohuanton, noya ninahuë ni'ton, natëpi. Co catahuarincohuë! naporini, co imaitonahuë!. Napoaton inasáchin sha'huitaranquëma'. ¹⁹Tëhuëenchachin Ispirito Santo ananitërinco ni'ton, na' cania'piro'sa' a'naroáchin anoyatërahuë Yosë natëcaiso marë!. Ina ni'sahuatona', natëpi. Ispirito Santori ya'coancantërin ni'ton, imapi. Quirosarinquë a'chintërahuë. Ina quëran pa'sápato, Iriricoquë huarë! Quisocristo nanamën a'chintëra'piarahuë. Ya'ipi parti pënëntërahuë. ²⁰Insëquësona a'na piyapiri a'chintohuachina, co inaquëso' a'chinahuë!. Co Quisocristo nohuitopiquëhuë! pa'nahuë. Ina marë! acorinco ni'ton, inaporinquëráchin a'china'huaso' nohuantërahuë.

²¹Yosë quiricanënuë ninorin:

“Nisha nisha parti co Yosë
nanamën natanaponarai-
huë!, natanapi.

Co nitotopirinahuë!, a'na
tahuëri nitotapi,” tënin.

Ipora huarë! nisha nisha parti a'chintërahuë.

Nomaquë yapa'ninso'

²²Napoaton hua'qui' nicapënuëma' yapa'pirahuë!, pa'sápato, co nanitërahuë!. ²³Isëquë nani ya'ipi a'chintërahuë. Naporahuatón, ya'nipishahuë! yani'nanquëma' ni'ton, iporaso' nicapënuëma' pa'sarahuë. ²⁴Nani yonquirahuë Ispania'pa' a'china'huaso marë!. Inatohua' pa'pato, nirapënuëma'. Naporo huarë! ninohuitarihua'. Hua'quimiáchin yacapätënuëma', pi'pian tëranta' a'chintaranquëma!. Ina quëran yapa'pato, catahuaco noya pa'i, topirahuë!. ²⁵⁻²⁶Iporaso nipurinhuë! Quirosarinquëton pa'sarahuë. Inatohua' na'a imapisopita ya'huëpirinahuë!. Ma'sha pahuantopi ni'ton, parisitapi. Ina natantahuatona', Masitoniaquë imapisopitari inahuara nohuanton yacatahuapi. Acayaquë imapisopitarinta' yacatahuapi. Pahuantërinso'pita nosoroatona', coriqui yontonpiso' quëtërinaco. Ina quëtonta'huaso marë! pa'sarahuë. ²⁷Inahuanta' Quisocristo imapi ni'ton, catahuatacaiso' pa'yatopi. “Cotioro'sa' imapisopita Yosë nanamën nitotatona', a'chintërinënpoa' ni'quëhuarë!, canpoarinta' ma'sha quëtacaso' ya'huërin. Nisha piyapinpoa' nipirëhuahuë!, Yosë nohuitacaso marë! catahuarinënpoa' ni'ton, canpoarinta' catahuahua' ama ma'sha pahuanchinasohuë!,” nitopi. ²⁸Napoaton cari coriqui quëtapo pa'sarahuë. Huënantahuato, nicapënuëma' pa'sarahuë. Ina quëran Ispaniaquë pa'sarahuë. ²⁹Canpitataquë pa'pato, Quisocristo noya catahuarinco nanamën a'chinta'huanquëmaso marë!, ténahuë.

³⁰Canpitanta' iyaro'sa' Quisocristo imarama'. Ispirito Santo catahuarinpoa'

ni'ton, ninosoroarëhua'. Napoaton chiní-quën Yosë nontoco' catahuainco. ³¹Cotia parti na'a piyapi'sa' co Yosë natëpihuë'. Inatohua' pa'pato, Yosë nontoco' ama macainacoso marëhuë'. Naporahuaton, coriqui quëtontahuato, Yosë nontoco' cotioro'sa' imapisopita Quirosarinquë ya'huëpiso' noya nicainacoiso marë'. ³²Ina quëran Yosë nohuanton, canpitataquë pa'sarahuë. Noya cancantato, nontaranquëma'. Noya ninontohuatëhua', chiníquën cancantarahuë. ³³Yosëichin asanocancaninpoa'. Canpitanta' noya catahuainquëma', tënhuë. Amen.

Nipayarinsopita yonquirinso'

16 ¹Imoya Huipi noya sanapi, tënhuë. Inanta' noya imarin. Sincriaquë ya'huaton, tiacona ya'conin. Inaquë imapisopita na'con catahuarin ni'ton, noya ni'co'. ²Canpitataquë canconpachin, Quisocristo imarama' ni'ton, noya nontoco'. Ma'sha pahuan-tohuachin, quëtoco'. Ina sanapi na'a piyapi'sa' catahuarin. Canta' catahuarinco.

³Pirisira, Aqiro, inapita yonquiato, saludos a'patarahuë. Na'con catahuarinaco Quisocristo nanamën a'china-ca'huaso marë'. ⁴Iráca a'napita yatëpapurinacohuë', inapita co chimirin tē'huatataraihuë', catahuarinaco. Ina marë' pi'pishachin shichiminaponaraihuë', catahuarinaco ni'ton, cha'ërahuë. Ina marë' "Yosparinquën," itërahuë. Nisha piyapi'sa' imapisopitarinta' "Yosparinquën," itopi inahuarinta'. ⁵Aqiro pëinënquë chachin a'naquën niyontonpi Yosë chinotacaiso marë'. Inapitanta' yonquiato, saludos a'patarahuë. Ipinitonta' saludos a'patarahuë. Asia parti pa'patëra, ina'ton Quisocristo imarin. Inaro'co noya nipayarai. ⁶Marianta' saludos a'patarahuë.

Na'con catahuarinquëma'. ⁷Antronico, Coniasë inapitanta' saludos a'patarahuë. Inapitasa' ca pochin cotio piyapi nipi. Quisocristo imapi anta'. Imaraiso marë' napopináchin tashinan pëiquë po'morinacoi. Yosë nohuanton, iráca inahuanta' acopi a'chinacaiso marë'. Noya a'chinpi. Co'huara ca imayatë-rasocohuë', imapi.

⁸Anpriasënta' saludos a'patarahuë. Inanta' Quisocristo imarin. Inaro'co noya nipayarai. ⁹Orpanonta' saludos a'patarahuë. Inanta' noya catahuarincoi Quisocristo nanamën a'china'huaiso marë'. Istaquisënta' noya nipayarai ni'ton, saludos a'patarahuë. ¹⁰Apirisënta' saludos a'patarahuë. Ya'ipi cancanën quëran Quisocristo natërin. A'napitari aparisitopirinahuë', co a'porinhuë'. Aristoporo pëinënquë ya'huëpisopitanta' saludos a'patarahuë. ¹¹Irotiononta' saludos a'patarahuë. Inanta' cotio piyapi. Narsiso pëinënquë ya'huëpisopitanta' Quisocristo imapisopita saludos a'patarahuë. ¹²Imoya Tripina, Imoya Triposa, inapitanta' saludos a'patarahuë. Nani tahuëri piyapi'sa' catahuapi Yosë imacaiso marë'. Imoya Pirisitanta' noya ni'nahuë. Inanta' na'con piyapi'sa' catahuarin ni'ton, saludos a'patarahuë. ¹³Noponta' saludos a'patarahuë. Noya Quisocristo marë' sacatërin. A'shionta' yonquirahuë. Mamahuë pochin ni'nahuë carinta'. ¹⁴Asincrito, Priconti, Irimasë, Patropasë, Irimisë, ya'ipi imapisopita inaquë ya'huëpiso', inapitanta' saludos a'patarahuë. ¹⁵Piroroconta' Coniarë chachin saludos a'patarahuë. Nirionta' oshinë chachin yonquiato, saludos a'patarahuë. Orinpasënta' yonquiarahuë. Ya'ipi imapisopita inapitarë' niyontonpiso' saludos a'patarahuë.

¹⁶Imaramasopita capini noya ninosoroatoma', nisë'quëco'. A'napita

Quisocristo imarinsopitanta' nisha nisha parti ya'huëpisopita saludos a'patarinënguëma'.

¹⁷Quisocristo nanamën nóya a'chintërinënguëma'. A'naquënso nipirinhüë' co no'tëquën a'chinpihuë'. Yaanishacancantopi. Ni'cona, iyaro'sa', nonpintochinënguëma'. Insëquësona a'chintohuachinara, nisha nisha yonquiapi. Ama inapita natancosohuë'. Tananpitoco' pa'ina'. ¹⁸Quisocristoso' hua'anënpoa' nipirinhüë', co inapitariso' natëpihuë'. Inahuara nohuantopisoráchin yonqui. Noyasha nonaponaraihuë', co no'tëquën nonpihuë'. Co noya nitotopiquëhuë' a'chintohuachinara, a'naróáchin nonpintopi. ¹⁹Canpitaso nipirinhüë' noya natërama' ni'ton, ya'ipi piyapi'sa' natantopi. Ina marë' noya cancantërahuë'. Na'con yonquico' noya nicacamaso marë'. Ama oshahuanamaso marë' yonquicosohuë'. ²⁰Yosëíchin catahuarinpóa' sano cancantacaso'. Sopai yanonpintopirinquëmahüë', Yosë catahuarinquëma' ni'ton, a'naróáchin sopai minsëarama'. Canpita marë' Yosë nontarahüë'. Inaora nohuanton, Siniro Quisocristo noya catahuainquëma', ténahuë. ²¹Timotionta' saludos a'patarinquëma'. Inaso' catahuarincó a'china'huaso'. Nosio, Cason, Sosipatro, inapitanta' saludos a'patarinënguëma'. Inapitaso' cotio piyapi'sa'. ²²Ca Tirsioico iso quirica ninshitaranquëma'. Paono sha'huitërinco' ninshitaranquëma'. Canpitanta' Yosë imarama' ni'ton, saludos a'pataranquëma'. ²³Acayonta'

yonquiatënguëma', saludos a'patarinquëma'. Ina pëinënguë yacapatërahuë. Inaquë chachin imaraisopita niyontónai Yosë chinota'huaiso marë'. Irasitonta' saludos a'patarinquëma'. Iso ninanoquë coriqui tapana'pi inaso'. Iya Coartonta' saludos a'patarinquëma'. [²⁴Inaora nohuanton, Siniro Quisocristo na'con catahuainquëma'. Amen, ténahuë.]

Ma noyacha Yosëso paya, itahua'

²⁵Nani tahuëriya Yosë chinotahua'. Ya'ipi nanitaparin. Ina achinicancaninquëma' imamiatacamaso marë'. Nanamën téninso pochachin catahuarinquëma'. Ina nanan chachin a'chintëranquëma'. Quisocristo nanamën inaso'. Iráca quëran huarë' co nanamën nitotopirinhüë', iporasó Yosë anitotërinpoa'. ²⁶Quiricanën quëran anitotërinpoa'. Iráca a'naya a'naya ninotona', Yosë nohuanton, ninshitopi. Iráca quëran huarë' Yosë ya'huërin. Co onporonta' chiminaponhuë'. Nanpimiatarin. Ina nohuanton, nanamën ya'ipi parti sha'huiarëhua'. Nisha nisha piyapi'sa' anitotarëhua' natëcaiso marë'. ²⁷Yosëíchin chinotacaso' ya'huërin. Inaíchin ya'ipi nitotërin. Quisocristo catahuarinpóa' noya noya ina chinotacaso marë'. Ipora quëran huarë' inasáchin chinotahua'. Ama onporonta' naniantahuasohüë'. Amen. Nani ninshitëranquëma huachi.

Paono